

C40  
4514  
69



C40-4514

了翁上座請大藏及有  
家書置之武州紫雲山  
我徵於塔院庭府中永  
為學友不敢許出院內  
當山二世鐵牛機謹誌



B 64853

佛說海龍王經卷第一

行品第一

聞如是一時佛遊王舍城靈鷲山與大比丘眾俱比

丘八千菩薩萬二千一切大聖十方來會眾德具足

得諸總持無所不博辯才至真決一切疑入大神通

分剖慧義諸度無極濟於彼岸究暢開士定意正受

諸佛咨嗟普遊殊域神足飛行降伏眾魔分別諸法

知如本諦覩見一切眾生之原積累道品於世八法

而無所著以大慈哀嚴身口意被無極鎧過大精進

西晉三藏法師竺法護譯



於無數劫而不厭倦爲師子吼開化外道以不退轉  
印如印之曉了諸佛深要法藏其名曰山光菩薩慧  
山菩薩大明菩薩總持山剛菩薩山鏗王菩薩山頂  
菩薩山幢菩薩山王菩薩石磨王菩薩雷音菩薩雷  
震雨王菩薩寶雨王菩薩寶事菩薩寶英菩薩寶首  
菩薩寶藏菩薩寶明菩薩寶幢菩薩寶頂菩薩寶印  
手菩薩寶暢菩薩寶嚴菩薩寶水菩薩寶光菩薩寶  
鑑菩薩寶現菩薩寶造菩薩樂嚴法菩薩淨王菩薩  
嚴頂相菩薩金光飾菩薩寶髻菩薩天冠菩薩千光  
菩薩原焰菩薩照明菩薩月辯菩薩發意轉法輪菩

薩金光淨菩薩常施無畏菩薩萬二千菩薩德皆如  
是也賢劫中大神彌勒輓首等六十大聖不可思議  
解縛等十六正士帝釋四天王與忉利天人俱鹽天  
兜術天不憍樂天化自在天魔子導師梵天王梵淨  
天王善梵天王梵具足天王大神妙天淨居天離垢  
光天乃至一善天燕居天無善神王各與眷屬六萬  
山樹神王四萬二千力士神王一名持傘三萬二千  
與香音神俱無焚龍王與七萬二千諸龍俱四方金  
翅鳥王及餘一切諸大尊神天龍鬼神無善神鳳凰  
神王山樹神王恬柔神等各與眷屬來詣佛所稽首

畢一面住比丘比丘尼清信士齋信女前爲佛作禮  
各坐一面彼時佛與若干百千之衆營從圍遶佛處  
諸天嚴淨師子高廣之座爲四部衆而普說法佛在  
衆中如安明山王現于大海德超諸天世無雙比光  
明巍巍靡所不照如來威變應時空中化有寶蓋衆  
珍雜校遍覆四方無數百千垂珠瓔珞青黃赤白無  
垢寶珠照虛空珠光從珠出其色無量不可稱計兩  
諸香華華至于膝虛空之中出大雷音雨衆名香於  
是賢者目捷連承佛聖旨前問佛言今所感動未  
曾見聞何瑞應佛告目連今海龍王欲來見佛故

先現瑞佛語未竟尋時龍王與七十二億姪女八十  
四億眷屬皆賁香華幢旛寶蓋百千妓樂往詣佛所  
前稽首畢遶佛七匝各以所持用散佛上妓樂供養  
與中宮眷屬俱住佛前以偈讚曰

慈施愍傷俗

示現與世眾

雖生於世俗

無著如蓮華

施俗之安隱

在世照三世

解脫如日光

稽首世最上

十力超施戒

自調成眷屬

燒除塵勞冥

御衆如調象

施與七大財

恩慈加衆生

爲一切父母

稽首最福田

眉間相光曜

如日白雪光

梵天人在上 無能見其頂 佛面出大光  
蒙光獲安隱 普照百千國 至于無擇獄  
柔軟言無短 解決衆疑結 音徧天世間  
清淨無垢穢 除姪怒塵冥 照以智慧光  
施安令歡喜 爲示現解脫 無礙達三世  
求比無等倫 知人羣萌行 了善惡所趣  
觀察人根原 一時咸能覩 開心令解脫  
稽首諸慧上 百千億諸魔 詣樹求佛便  
至德願威神 降化伏邪心 不瞋不厭倦  
導以慈哀力 供養世之尊 孰敢懈慢者

觀法無所有 譬之如虛空 猶電霧泡沫  
幻化及野馬 本空緣相與 計之無吾我  
照示生死法 是故莫不供 所以無數劫  
勤行億那術 供養億萬姪 不可計諸佛  
布施及戒忍 精進禪智慧 尊願已具足  
稽首大聖神

於是海龍王說此偈讚佛已前白佛言願欲有所問  
儻肯聽者乃敢宣陳佛言在汝所問若有疑者如來  
當爲具發遣之龍王見聽喜踊問曰何謂菩薩除諸  
惡趣何謂菩薩超出諸難何謂菩薩生天上人間何

謂菩薩不離諸佛何謂菩薩得值善友何謂菩薩常在安隱何謂菩薩常懷篤信何謂菩薩多所悅護何謂菩薩濟衆因緣何謂菩薩長益善法何謂菩薩喜造德本何謂菩薩常樂於義何謂菩薩不著五陰何謂菩薩常好於法何謂菩薩樂於法樂何謂菩薩所聞無厭何謂菩薩請益觀義何謂菩薩聞能奉行何謂菩薩具出家德何謂菩薩離居順戒何謂菩薩棄於重擔何謂菩薩常處樹下何謂菩薩樂處閑居何謂菩薩而獨燕處何謂菩薩離諸諛詔何謂菩薩具出家慧何謂菩薩入深要法何謂菩薩觀法如幻何

謂菩薩不墮滅見何謂菩薩不墮常見何謂菩薩超因緣法何謂菩薩離諸邪見何謂菩薩神通自樂何謂菩薩而得六通何謂菩薩而得慧通何謂菩薩漏盡神通何謂菩薩見無盡慧何謂菩薩所見無礙何謂菩薩曉了衆生心之所行何謂菩薩行無厭足何謂菩薩分別所受教化之言何謂菩薩降伏魔怨何謂菩薩離諸恐懼何謂菩薩御退轉者何謂菩薩得不退轉何謂菩薩遠不起忍何謂菩薩過於諸淨何謂菩薩諸行清淨何謂菩薩世尊受決佛言善哉善哉海龍王乃問如來如此之義諦聽諦聽善思念之

龍王曰唯然世尊願樂欲聞佛言菩薩有四事棄諸惡趣何等爲四菩薩無害心於衆生常護十德不說人短亦不輕慢自省已過不訟彼穢是爲四復有四事超出諸難何等爲四常歎三寶佛法聖衆有樂法者而不燒亂不造人疑有猶豫者悉開導之是爲四復有四事生天上人間何等爲四不捨道心而教化人亦不毀戒心願清淨爲人說經而發大哀是爲四事復有八事不離諸佛何等八常念諸佛供養如來嗟歎世尊作佛形像勸化衆生使見如來其所向方聞佛之名願生彼國志不怯弱常樂微妙佛之正慧

是爲八事復有四事得值善友何謂四不慢無諂常加恭敬柔和順言而不自大常受言教是爲四復有三事常在安隱處何等三不剛不韌而不諛諂除諸貪嫉見人得供代其歡喜是爲三復有五事常懷篤信何等五曉樂脫力積功德力入報應力尊道心力將御法力是爲五復有二事多所悅護何等二不捨歡喜不在瞋恨是爲二復有二十事護衆因緣何等二十常信佛教不著他緣所作自護他作他受法法相應法法相照善惡報應無亂不順心無想念無我無人都無所有亦無往來無所歸趣除因緣報由罪

福安危將護諸緣諸佛世尊皆由清淨而成道德除  
衆惡事以故吾等修行善本是爲二十復有二事長  
益善法何等二知於三品行無放逸是爲二復有二  
事何等二喜造德本亦不想報是爲二復有五事常  
樂於義何等五不著色聲香味觸是爲五復有五事  
常好於法何等五不貪色痛想得智慧擁護一切  
是爲五復有六事常樂於法何等六樂於五根不樂  
五欲常樂法會不樂世談樂講說經不樂衣食常樂  
觀法不樂不淨樂遵修法不樂文字樂於佛法不樂  
聲聞緣覺法是爲六復有八事樂於法樂何等八樂

講佛道不樂卑賤樂度無極不樂聲聞緣覺道樂講  
四恩不樂非法樂大慈哀不樂世事樂說大道不樂  
終始樂講深法緣起之本不樂常無常我人壽命樂  
空無相不願真諦之法不樂調戲離放逸想樂嚴佛  
國不樂觀滅是爲八復有五事所聞無厭何等五博  
聞智慧利於明達聞無厭足普聽不懈決諸狐疑聞  
無厭足因聞覺了塵勞恚恨故無厭足因聞斷欲而  
除一切衆生垢著故無厭足因聞勇猛決一切疑故  
無厭足是爲五復有二事觀義求聞不倦何等二興  
於賢聖正見之行得無礙辯總持之要是爲二復有

十事聞能奉行何等十利知厭足在於閑居身心  
寂進止安詳所聞觀淨獨處少事不樂衆鬧初夜後  
夜常觀精進敬重善友志懷羞耻常以大哀護於一  
切等賢聖禪至德具足以慧救護天上世間是爲十  
復有五事具出家德何等五所作已成不復忘失滅  
除塵結其心當捨一切諸著諸佛世尊不說其短已  
得解脫見諸縛者爲說脫法是爲五復有五事出家  
順戒何等五救濟毀戒順諸所聞救濟少聞順所定  
意救濟亂心順所智慧救濟惡智順所度智立於衆  
人安隱無爲是爲五復有五事何等五棄於重擔而

除五陰斷恩愛結及諸所習常以寂定捨於寂滅入  
于道德奉行八道人於聖諦立一切人於正諦法是  
爲五復有四法常處樹下何等四不惜身命奉行一  
切諸德善法發神通慧行寂然事天人欣悅是爲四  
復有四事樂處閑居何等四發於大哀以處閑居諸  
佛所歎欲救衆生無偏邪行坐成佛時莊嚴自身不  
爲塵勞學餘菩薩究竟之行積閑居德人於郡國縣  
邑聚落爲衆說法是爲四復有三事而習燕坐最尊  
無上功德微妙爲賢聖行何等三不習憎愛亦無所  
慕自在離欲心無縛著行步自由等心一切疾得定

意是爲三復有三事離諸諛諂其心質直而無恚恨  
已住於行衆結便斷是爲三復有八事具出家德何  
等八賢聖知足在於獨處得知限節逮諸博聞棄恨  
忍辱不捨道心行四意止專精定意而應智慧一切  
所興以行爲要是爲八復有十事入深要法何等十  
見身自然諸法自然身入於淨一切法淨見已無吾  
諸法無我自觀身空不疑諸法空已身無聲諸法如  
響察身寂寞諸法靜默我者審諦觀諸法諦我志深  
妙見諸法與已身無聞諸法如聾吾無所受見一切  
法無可取者是爲十復有十事諸法如幻興誑詐相

諸法如夢所見無實諸法如野馬起顛倒想見不諦  
故諸法如影所作因緣無以爲樂諸法如水月捉不  
可得其相離行諸法如響本末悉空諸法如電光現  
隨滅諸法如畫離姪怒癡諸法本淨不爲客垢之所  
玷汙諸法如虛空適起尋滅無有處所是爲十復有  
二事不墮滅見何等爲二隨時之慧入於罪福了別  
諸佛聖智之明是爲二復有二事不墮常見何等爲  
二一切說無常慧適起便滅意無永存是爲二復有  
四事超因緣法何等爲四無黯之習入生死習無慧  
已滅生死便除不墮滅見不住常觀是爲四復有四

事離諸邪見何等四曉空慧不見彼我解無相不見  
壽命了無願不見三處分別緣起離常無常是爲四  
復有六事以諸神通而自娛樂何等六不以惡眼視  
於衆生得天眼淨聞惡聲音則能忍辱逮天耳淨其  
心不亂覩他心淨植衆德本則識過事如口所語身  
行亦爾獲神足淨修行諸法不欺法師盡諸漏淨是  
爲六復有六事而得六通何等六以然燈故得天眼  
淨施諸音樂得天耳淨施無希望了衆生心植衆德  
本知過去事却諸陰蓋決衆狐疑逮神足淨以法布  
施盡諸漏淨是爲六復有六事而得通慧何等六適

見如來逮天眼淨合會說法得天耳淨制伏其心見  
衆生意常習六念得識宿命棄諸貪濁逮成神足輕  
舉能飛遵修諸法得盡諸漏是爲六佛復告龍王有  
以神通而自娛樂聲聞緣覺眼及外道神仙天龍鬼  
神無善神鳳凰神王山神王恬柔神人與非人所有  
天眼計菩薩眼最上無極清淨明徹除如來眼菩薩  
之眼無所不見天人光色諸法之本無所罣礙又聲  
聞緣覺及天龍神人與非人計菩薩耳最上無極清  
淨明徹除如來耳菩薩之耳無所不聞天人音聲諸  
法之講無所罣礙聞諸音聲知三達事皆了一切衆

經  
佛說海龍王經卷一  
十一  
景  
生之心所行造念因緣報應往來之想淨不淨著不著若干種心若逆心若順心縛心解心依心不依心惑心定心有處所心無處所心若興衰心已曉了之悉見人根如應說法已識宿命知彼我本終始所起無所不達至誠不虛神足無倚無所不現是爲菩薩五神通又心自在所作具足是爲娛樂示現佛身而般泥洹不永滅度何謂菩薩盡漏神通菩薩超越聲聞緣覺所得解脫倚於佛慧曉了衆生一切本淨不盡諸漏而不取證爲一切人讚諸漏盡是爲六神通復有四事見無盡慧何等四遵修慧德致此五通行

大慈大哀知四解行奉善權慧逮四無色定意正受空無相無願致三十七道品之法是爲四佛復告龍王何謂所見無礙諸有塵勞除一切垢所有罣礙現生死本導御泥洹現聲聞緣覺乘法至道場隨勸習俗示人行寂是謂無礙復有無礙現一切數至無所有現滅諸數逮無所著雖在有數諸行之事於無數法無所罣礙彼無陰蓋得至無爲於有爲法亦無罣礙是謂菩薩現無礙慧復有四事曉了衆生心之所行隨習俗慧正受明了識意所爲善權方便於諸法自在是爲四復有五事行無厭足何等爲五已獲大

安令衆生安大哀堅強視一切人如已骨髓隨人所行而示現行立於極上奇特之德是爲五復有六事分別所受教化之言何等六逮得總持心立寂然入審諦淨心入諸慧辯才無著無止方便之慧次第解說是爲六復有八事降伏魔怨何等八曉了五陰譬如若幻離貪見塵而行空事知一切法皆無所生隨其所生如開導之不捨道意堅強精進不捨佛道不畏三界離於所有觀於人物求審諦慧觀無常相積德不厭合集智慧不樂聲聞緣覺之智是爲八復有十事離諸恐懼行菩薩事何等十行於布施以莊嚴

想立於禁戒斷諸惡趣遊於忍辱諸根不亂堅強精進種善不倦修行禪定其心不慌成于智慧而離塵勞善權方便曉了無邊聖智之願得分別事解知法義辯才隨順逮得總持決除衆生諸所狐疑得住佛位護一切法是爲十復有八事御退轉者何等八言行相應自省已過不說彼闕寧失身命不造輕重獲利不喜無利不感心不懷害誘導一切興衆祐意等敷禁戒不捨師法安悅衆人不自求安一切所愛施而不悔是爲八復有五事得不退轉於無上正眞道何等五善權方便成諸度無疑入深妙法了審諦義

神通無礙見衆生根分別諸慧諸行無所著行不可盡遊於緣起不盡一切諸漏之證是爲五復有三事速不起忍何等三察人清淨而無吾我法淨寂寞慧淨無著是爲三復有三事過諸清淨過去清淨諸法當盡當來清淨法無所起今現清淨法無所住是爲三復有三事身行清淨功德熾盛口言清淨智慧巍巍意念清淨定而不轉是爲三復有四事爲佛世尊所見授決何等四情性和順奉遵于法具足諸行觀清白行速得慧力解一切心了諸法本淨不起不滅所由不亂佛告龍王是爲四法菩薩所行爲佛世尊

所見授決

分別品第二

佛說是已十二億百千諸天龍神香音神人與非人皆發無上正真道意七萬二千菩薩得不起法忍百四十萬衆得法眼淨遠塵離垢八千比丘漏盡意解五千天子得離愛欲三千大千世界六反震動其大光明普照世界空中自然而雨天華諸天在上鼓百千妓樂共歎頌曰今者如來所說經法爲再轉法輪在波羅奈所轉法輪今說斯經復加增倍所以者何於此經者爲無央數不可計人開導利義若人聞此

德本不忘何況受持能奉行者善得人身快見如來  
諦聞此法聞此法已便發無上正真道者閉塞惡趣  
開天人迹當觀此比如獲滅度於是世尊讚諸天子  
曰善哉善哉快說此言聞斯經法歡喜信者佛所建  
立開化大乘是等之類逮如來慧不退轉印而以印  
之終不餘趣順至佛道超諸苦難於是龍王聞說斯  
經欣然喜踊善心生焉有摩尼珠名曰立海清淨寶  
嚴普明價直三千大千世界以奉世尊其珠之光覆  
蔽日月之明一切衆會得未曾有禮佛而住同音而  
歎佛興難值既興於世乃現若茲未曾有法時海龍

王獻寶珠已而白佛言以是德本逮得無礙佛身光  
明令其光明普照十方諸佛國土若人蒙光除諸塵  
勞如今如來眉間光明令我如是蠲却衆冥逮平等  
覺其入邪者令立正道

六度品等第三

海龍王白佛言何謂菩薩蠲却衆冥佛語龍王菩薩  
智慧殊異手執慧燈分明智慧智慧最勝持智慧劍  
有所興造皆以智慧建立智慧修行於戒忍辱精進一心  
精進禪思智慧建立智慧修行於戒忍辱精進一心  
普觀諸法建立智慧開化衆生菩薩何謂建立智慧

而行布施等於布施布施已等等於吾我我已等  
便等於人已等於人諸法得等諸法已等得諸佛等  
雖有所施不捨是等既所施者不隨塵勞而以施時  
捨一切塵亦復如是捨一切生則一切施離諸住見  
棄諸所有是爲菩薩建立智慧而以施彼何謂菩薩  
建立智慧而奉禁戒見身意寂斯護禁戒不倚身口  
意不倚今世後世亦無內外不倚陰蓋四大諸人不  
倚覺意不倚滅度於一切法亦無所倚則爲護戒不  
以戒戲亦不放逸是爲菩薩建立慧戒彼行忍辱亦  
不得我亦不得人亦不得我人不住吾所不住我所

我淨人淨我淨人淨見一切法淨是爲行忍彼雖行  
忍於諸法無作於法不起不滅彼雖行忍於諸法無  
寂不寂彼雖行忍見人空寂而無吾我亦不恐怖彼  
雖行忍亦不得身口意彼雖壞身段節解之自觀其  
身如草木墻壁則爲忍辱彼聞惡言罵言自在言不  
可取言清淨言無處所曉了所言則爲忍辱彼雖亂  
心心無所結本無之心各各無實須臾滅盡以觀如  
此則爲忍辱是爲菩薩建立慧忍彼修精進長諸善  
法觀其法界不增不減等御法界察一切法不見諸  
法立成就者觀倚世者由從不實顛倒而興彼以清

淨智慧之明觀一切法不隨諸法不捨諸法不觀諸法之所積聚不見去來何所從來何所從去曉了諸法遵法如是分別苦諦顛倒之事爲人說法修行精進彼諸衆生無實無諦若人無得一切諸法亦不可得所以者何人不離法法不離人如人自然吾我自然吾我自然諸法自然佛法自然其以如是求諸佛法如自然者解自然已便逮佛法其有求者若已求者甫當求者彼求此已求無所得是爲菩薩建立智慧精進之行彼於禪定而以正受不壞平等亦不成就彼於禪定而以正受諸法無思亦無所捨亦不合

會於諸境界行無著禪立諸禪法於諸法等亦無錯亂非身非心思惟禪定志性無所應行不以禪行等於本無而以正受於本淨法而致平等一切人則致平等諸法本淨本無有色不以三昧所行如應心而不住內亦不起游外識無所住度於一切墮顛倒者超出五通聲聞緣覺禪定正受彼以禪定出智慧上陰界塵勞彼以禪定志願于道開化衆生是則如來常一禪定至于滅度是爲菩薩建立慧定彼觀諸法以慧眼察亦非肉眼亦不天眼觀諸法已見諸法寂觀諸法默諸法寂寞無行無處諸法淡然無所成

就普觀諸法皆已如是如是觀者是爲法觀法觀如是不見諸法之所歸趣其有見法而不觀者不以見法而成觀也無求無曉不知不見是爲見法無我無人無壽無命是爲見法假使菩薩觀法如此見人顛倒益於衆生而發大哀法淨如是衆人倚著於是菩薩發弘大志欲度羣萌是羣萌者常無萌類是爲菩薩建立慧法

無盡藏品第四

佛告龍王何謂菩薩建立智慧爲人說法不見有人人者無我無人非身人者寂寞人無所有人者本淨

人者音聲人者名耳人空無相無願人非有數人如審諦人無所生人不有起爲人說法講人清淨不懷吾我無壽無命不滅自然不滅所有隨人本行而爲說法何況衆生本淨自然無我自然無形自然則人自然設人自然以此自然諸法自然設諸法自然一切佛亦復自然是謂一切諸法悉爲佛法一切諸法但假名耳因號有名設說諸法則講非法所以者何如法所言非法亦然如呼法音則非法音所以者何諸法法界及與本淨不可言說亦無所得法界本淨亦無所持一切法界諸法本淨壞一切法何所成就

是爲諸佛法爲說經法以是因緣寂寞如是不有諸  
佛法聲之化識也佛法無教而不可處有爲無爲所  
以者何不離有爲無爲而以解脫寧有異法可計數  
乎龍王答曰不也世尊諸法無數如來無數佛言如  
是如是如仁所言諸法無數如來無數則無有二於  
龍王意云何無數之言有處所乎答曰不也世尊佛  
言以故當知當作斯觀佛法無處無言如佛法無言  
無處一切諸法無言無處亦復如是龍王觀視如來  
大哀巍巍若茲開化衆生令立堅固又一切法無處  
無教說因緣教是法有漏是法無漏是有現世是度

世事有著無著有數無數有爲無爲塵勞瞋恨習是  
捨是凡法聖法學法不學法聲聞法緣覺法菩薩法  
佛法佛言龍王如來如是爲人說法講其處所亦不  
見法無諸法想譬如有人虛空無色無見欲以諸色  
盡於虛空而作天像及諸人像象馬步乘彼人盡是  
寧難不乎答曰甚難甚難至未曾有天中之天佛言  
龍王如來所爲甚難於彼諸法無色無取而不可見  
亦無文字亦無所得而爲一切講說言教示現文字  
設以方便此乃甚難其有信人如是像法是等諸人  
多所成辦若有受此深妙義者不爲諸魔之所得便

緣  
憶念我過世龍王更見供事無央數佛恒輒捨家淨  
修梵行彼如來等未曾爲吾說深妙法應病如講布  
施持戒學道之法聽聞忍辱仁和之教宴居靜處止  
足行德所以者何行德未了了行德已從大珠曜如  
來卽得聞斯深妙之法應時速成柔順法忍以是之  
故當知此義當作是觀聞是深法功德具足從過去  
正覺受此深經無相無名衆穢因緣無我無人無壽  
無命信樂受持諷誦爲他人說其福甚多若有菩薩  
愍傷一切欲令安隱使三千大千世界一一衆生皆  
得所安諸天人民合集此德施與一人於龍王意云

何其菩薩寧爲衆生加無極安不乎答曰甚多甚多  
天中天佛言其有菩薩施諸衆生若干安隱若爲人  
說一句無常苦空非身之義空無相無願無我無人  
無壽無命不生不起之事則是施安福難稱量所以  
者何有爲之安衆生皆得無爲之安未曾歷也彼其  
以此深妙之法而暢音聲於無爲安以爲服食是故  
菩薩欲自立義具他人願當學深妙之法若有菩薩  
所在會坐捨深妙法說雜句飾則爲斷絕正法之化  
所以者何是深妙法布閻浮利而不沒盡人所聽受  
樂於法者不足言耳非人最多假使法師藏深妙法

讀雜句者不樂深法天則不歡悅是族姓子隨世所樂而說俗事嗚呼痛哉此衆會中無說法者心懷悵感而退捨去時海龍王白世尊曰布施持戒學道之法是俗事耶棄家出學淨修梵行非佛法耶世尊答曰諸佛興已起無起法於三界行有所救護皆是俗事非是佛語彼則何謂四禪四等心四無色定五通十善之行布施持戒忍辱精進一心智慧書疏校計經卷體醫方藥巧工技術計身身想衣食財物所受禪定在三界行皆是俗事非爲佛語佛告龍王佛興於世間所未聞非常之苦非我之寂除於苦義斷于

集義證於盡義遵修道義入乎空義度於無相導御無願於諸衆行不生不起義意止意斷根力神足覺意觀入寂路求真諦本淨如無所起陰種諸入爲空寂義所由諸義不壞諸法不壞非法解一切法不生不長皆無所起不計有常無常由因緣起得無所生逮於本淨而離色欲現無數法入於道法在於道法無想不想無應不應捨於一切念淨不淨想無舉無下陰幽冥門自然如空得平等行於想等想無想於想離想均於一想離一切想無所觀見寂諸所見現諸顛倒一切平等謂得果跡皆音聲耳彼無所得亦

無不得不受不捨佛語龍王是所先說諸法之御不  
可得不可稱說至於聲聞獲聲聞乘至於緣覺獲緣  
覺乘菩薩逮得起法忍成於如來無上正真道爲  
最正覺斯謂佛言是所言者隨習俗教皆是佛法救  
於真諦佛道無文佛言無言佛教無跡佛教無相佛  
教無歎佛教無化佛教無止佛教無名佛教無思佛  
教無心意識亦無所念是謂佛教而不可說亦無言  
教不可指現佛語龍王如是比教乃爲佛言如來不  
以文義說法無文字教而爲說法是故無文則爲佛  
教佛所說法不有所逮滅一切得佛所說法是故無

得爲佛所言佛所說經曾無言教寂滅言教以故言  
曰無教佛所說法無取法無倚法無放逸法無想法  
無起法無壞法無究竟法無所得法無所志法無所  
念法無所行法無分別法無有想法無所至法無所  
推法佛語龍王如來爲人說法未曾有行有所證也  
吾之所言一切本淨法無形色是故龍王諸法無像  
是名佛 又復何謂號爲佛言解一切音無所不達  
故曰佛言除去來今無所罣礙故曰佛言覺了衆言  
故曰佛言報答諸問故曰佛言一切所說因緣有言  
無所不博故曰佛言覺諸所說如呼聲響故曰佛言

無字無說故曰佛言諸所字說亦皆佛言所以者何是諸文字去來今佛所說今佛所說者已說之者當來說者以是之故一切文字諸所言教皆名佛言入如此比曉了衆慧是謂菩薩分別道義故曰文字言說皆號佛言不壞法界志一味慧是爲菩薩分別經本故曰文字言說皆號佛言其有如應順于法慧是謂菩薩分別順寂故曰文字言說皆號佛言其有說慧無處無著是謂菩薩分別曉了是故龍王一切諸法莫不歸此分別四義菩薩解四義者文字言說有所歸趣身有所在莫不誘進皆入佛教是故無著本

無所住於百千劫有所言說無能制者所以者何是名曰無盡藏總持門也假使菩薩逮斯持者說無盡句善順於教棄去來瑕如應無倚莊嚴百千真妙之句忍於本淨將護不亂尊卑之義曉了平等光曜所有塵勞瞋恚入一切行而順解脫八萬四千諸根尋如所應善講本性而爲說法不盡八難音聲諸法亦無有盡及譬喻慧三世無盡及報應果願可盡耶經典順音可盡耶心之所入可盡耶因緣愚跡可盡耶順在愛欲可盡耶發于所持可盡耶說乘所處可盡耶分別法處可盡耶深妙雜句可盡耶至於究竟可

7 8 9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5

佛說海龍王經卷第一

盡耶逆順之言可盡耶名字之訓可盡耶歎佛法眾  
可盡耶宣說正諦可盡耶佛道法品可盡耶罪福所  
應可盡耶講度無極可盡耶佛語龍王是名曰所說  
無盡故號無盡法藏為總持門也

佛說海龍王經卷第一

音釋

鎧苦亥切

鐙都騰切

恬徒謙切

沫莫割切

姦古哀切

十京曰姦

燒而沼切

鞞五孟切與鞞同堅強也

黯胡八切

愴烏玄切

憂也

佛說海龍王經卷第二

西晉三藏法師竺法護譯

總持品第五

佛告龍王有四事法無盡之教無盡之藏為總持也  
何等四分別無盡明慧無盡明智無盡總持辯才無  
盡是為四復有四事難攝無盡藏為總持也何等四  
其性難攝道心難攝入法難攝入眾生行難攝是為  
四復有四堅固要無盡之藏為總持也何等四所願  
堅固奉行堅固立忍堅固度於因緣所造堅固是為  
四復有四所說無盡之藏為總持也何等四講諸至

佛說海龍王經卷第一

誠講諸緣起講衆生行講諸乘本無慧是爲四復有四光無盡之藏爲總持也何等四照于法界照于智慧照于慧明照于如應之所說法是爲四復有四上曜無盡之藏爲總持也何等四精進爲上禁戒修行勤力爲上求積功德爲上合集求慧爲上是爲四復有四無窮無盡之藏爲總持也何等四求諸度無極而無窮極不厭生死而無窮極開化度人而無窮極求諸通慧而無窮極是爲四復有四無厭無盡之藏爲總持也何等四佛前聽經而無厭足爲人說經而無厭足求諸德本而無厭足供養如來而無厭足是

爲四復有四無能勝者無盡之藏爲總持也何等四一切塵勞亦無能勝一切諸魔亦不能勝諸外異道亦不能勝一切怨敵亦不能勝是爲四復有四無習無盡之藏爲總持也何等四不習聲聞緣覺之乘不習一切供養之利不習一切諸所著求不習一切諍習凡夫行是爲四復有四無得無盡之藏爲總持也何等四不得所生不得開化惡戒之人不得說經在於有爲爲上大乘不得乞求是爲四復有四力無盡之藏爲總持也何等四忍力忍於一切所作衆惡慧力闍除一切衆生疑結神通力見一切衆生心之所念

經  
在諸部經卷之三

七

第一

經

南紀券卷之三

二

二

善權力爲一切人如應說法是爲四復有四大藏無盡之藏爲總持也何等四不自侵欺不斷三寶是則大藏入於無量之法是則大藏得一切心隨其所志是則大藏慧等如空是則大藏是爲四復有四無極無盡之藏爲總持也何等四博聞無極智慧無極所願無極順衆生說無極是爲四菩薩復有四事不自侵至無盡之藏爲總持也何等四說法不自侵說至誠不自侵順法行不自侵得至道極不自侵是爲四復有四事得無所畏無盡之藏爲總持也何等四不畏惡趣不畏衆會不畏決疑不畏失佛道是爲四無

盡之德爲總持也佛告龍王是無盡藏總持說德無量入無極慧集菩薩行所可由慧光曜莊嚴菩薩所求菩薩財寶所入法藏入總持門分別言教嚴身口意得淨諸國合集自在護念正道入衆生敷慧化導正法力精進具諸度無極嚴淨道場逮諸佛法是謂無盡之藏總持其有文字名號之數及佛法諸數遊于正法皆來歸斯無盡之藏爲總持也菩薩入斯於諸文字無所分別諸法清白不壞本淨故樂一切法不侵樂法故究竟諸法所志諸法亦無侵欺一切眼法不侵諸法明故諸法假號不侵會法故以逮諸法

不侵行精進故諸法調定於柔順法無所侵故諸法  
說之無侵光曜焚燒諸法於無起法而無侵故信一  
切法於所好法亦無侵故說一切法於諸言教無所  
侵故諸法本無於無趣法而無侵故諸法審諦等三  
世法亦無侵故諸法常住於不動法亦不侵故諸法  
有哀隨本所樂而爲現法故諸法悉等說無差特故  
諸法求跡示現諸法至平等故諸法所至示現入深  
道門故諸法至力現諸上法故諸法愚冥爲現智明  
故懷來諸法示現諸法無所亡失故總持諸法示現  
諸法爲無盡故諸法寂然現憺怕故諸法虛空而爲

示現廣普之法故諸法無明現癡本故諸法悉住現  
所立處諸法入慧現離癡法故諸法入也而爲示現  
分別諸法故諸法離有而爲示現離所有法故諸法  
有難而爲示現諸法瑕穢故諸法常念而爲示現宿  
命事故諸法有緣示現諸法而有侵故諸法入志而  
爲示現寂諸亂故諸法極重而爲示現無所動法故  
諸法住處而爲示現衆法界處故諸法導師而爲示  
現審諦之法故諸法致果而爲示現志無所念故諸  
法唯陰而爲示現蠲除五陰諸法苦患故諸法生死  
示現諸法無塵故諸法空寂示現諸法無所倚故諸

法如固示現諸法斷衆固故諸法寂滅示現諸法斷  
因緣故佛語龍王是名曰文字緣會無盡藏總持菩  
薩得是分別一切文字所興譬如文字而不可盡諸  
法所說不可盡亦復如是譬如文字亦不從身出不  
從心出諸法如是不可知處不住在身不住在心譬  
如文字無所依倚而求解脫塵勞之事亦無所淨菩  
薩已得無盡藏總持雖說塵勞不著塵垢究竟本淨  
譬如文字不合在身然爲他人有所解說諸法如是  
有所發起教心清淨如文字有所說時無所至湊無  
所言時不處在內諸法如是假使說時無所至到設

不說時不積在內如文字無色無見而現在外諸色  
如是無色無見由心因緣而有退轉如文字虛空自  
在寂寞悉以恍惚無作字者諸法如是虛靜寂寞無  
有造作如文字不出染汗瞋恚愚癡又因文字而有  
音教諸法如是不出染汗貪駮之感由從想念起姪  
怒癡如文字因諸會緣說得果證文字無得亦無有  
證諸法如是因其緣對說有果證計於本法無果無  
證譬如諸法無果無證如諸法無不因文字諸行如  
是所有諸法皆由佛道

總持身品第六

佛語龍王菩薩已住無盡藏而以文字求於佛道總持文字力也歸趣文字身也滅盡像色也入法門頂也觀瞻額也慧眼眼也天耳耳也說名字鼻也制亂意眉間闕庭也攝一切心面也解喻一切可衆生心舌根也調定其心齒也師子觀奮迅髦也藏匿空語唇也觀一切法咽也勉出衆生令其歡悅肩也端正所講脾也察諸法等腹也入於深門齋也入左右路掌也合會諸法臂也十善之句爲善救護指也清淨法銅爪也來致虛無之念脇也次第講法脊也說不侵時無所爲度尻也具足寂觀髓也趣審諦法膝也

曉知一切踰也心意寂然足跌也遊到十方足心也次第說諦步也知羞慙恥衣也法鬘莊嚴傳飾也法樂若干卧具也說種種法枕也不瞋不諍塗香也所行如應無所不了雜香也入深戒說香也於諸法自在眷屬也嗟歎梵跡則親友也快得安隱衆知識也斷諸結縛開化衆人則親昵也曉了諸事家室也其心清淨母也一切巧便無所依信慧父也諸通慧心從等也施度無極漿食也戒度無極泰安也忍度無極莊嚴也精進度無極信作善尅辦也一心度無極無飽滿也智度無極隨時順也善權度無極二和合

義也道品身支黨也講說至誠未曾侵欺一切世間  
尊豪自由於法自恣佛語龍王是爲無盡之藏總持  
無色像身也其菩薩如是總持樂法之樂譬如國王  
在於中宮如天帝釋在須彌頂威神巍巍如梵天尊  
豪貴自在如燕居阿須倫難可制持如海無邊功德  
超殊如寶大山天所娛樂如父母獨有一子愛重無  
極如月盛滿衆星獨明莫不稽首如世尊爲天世人  
奮大光明如日初出光曜柔和如孔雀在林樹間放  
妙音聲如師子在巖窟中服美飲食如龍心意調和  
以時澍雨如轉輪王大法化國如衆龍舞動發震雷

亦如龍王已得自在降大法雨如天帝釋撫化一切  
諸外異道如勇猛將摧伏嚴敵除諸勞垢降納衆魔  
如水消火如風靡草心計如地開化萌者順化衆生  
如火焚草皆忍苦樂猶如乳母養長者子療治衆病  
持心堅強具衆人願如如意珠王總持諸寶佛語龍  
王其有菩薩住無盡之藏總持門者則可謂入佛之  
道場亦如大海含受衆寶諸珍篋府無盡之藏總持  
如是苞弘諸法道寶篋藏如無數香篋令無量人恣  
意所欲菩薩已住無盡之藏總持門者以真妙言開  
化一切令各得所是總持者入一切聲此土名道心

者彼無盡世界佛一寶蓋如來國曰目前此名諸通  
慧者彼超得度世界道龍王如來佛國曰普達此名  
施度無極者彼寂定世界吉祥如來佛國曰精氣此  
名戒度無極者彼無憂世界離憂如來佛國曰多安  
此名忍度無極者彼無垢世界離垢如來佛國曰無  
盡句此名進度無極者彼普明世界無垢光如來佛  
國曰上度此名禪度無極者彼導御世界堅要如來  
佛國曰寂行此名智度無極者彼陰雨世界雨王如  
來佛國曰清淨此名善權方便者彼尊調世界離垢  
臂如來佛國曰隨習俗宜此名慈哀喜護者彼豐盛

佛言海前三卷之一

七

東京

世界吉祥義如來佛國曰憐傷仁攝彼我二寂此名  
苦集盡道者彼無悅世界首寂如來佛國曰本原由  
根原盡歸本此名四意止者他方世界曰無止此名  
四意斷者彼曰上勝此名神足者彼曰超步此名五  
根者彼曰悅原此名五力彼曰堅強此名覺意彼曰  
無冥此名八由彼曰所度此名分別彼曰自見此名  
護御彼曰隨順此名法施彼曰善攝此名寂觀彼曰  
定察此名脫門彼曰離癡此名功德彼曰嚴辯此名  
智慧彼曰了便此名棄家彼曰修行此名具戒彼曰  
無犯此名安隱無爲彼曰寂滅度此名曰嘆佛無量

經

佛記海前三卷之一

八

二

彼曰佛眼放光佛語龍王計諸佛國音聲言訓若干種教菩薩若逮無盡之藏皆知一切諸佛之土所說音聲文字所誨佛以一劫若過一劫讚歎有爲言說章句之教十方所說不能究竟諸佛國土音聲義也佛說是無盡之藏總持門時六萬菩薩皆得總持八千菩薩得不起法忍三萬二千人皆發無上正真道意

總持門呪品第七

爾時佛告龍王菩薩以是離諸幽冥之結趣諸通慧往古不可計無央數劫不可思議彼時有佛號曰梵首天王如來至真等正覺明行成爲善逝世間解無上士道法御天人師號佛世尊世界曰集異德劫名淨除彼時集異德世界豐盛安隱五穀自然快樂無極天人繁熾如我此土百億四域合爲一佛國則爲彼土一大四域如是之比百億須彌山此梵首天王如來集異德世界廣大無邊乃如茲乎其世界如金剛光明摩尼之寶自然常普大明以寶交絡周帀覆蓋懸繒幢幡百千妓樂於虛空中不鼓自鳴其妓樂音普聞佛土彼妓樂音不出姪怒癡欲之音聲也唯演寂然愴怕法樂歡喜之音諸天人民聞樂音者則

逮一心寂定安隱宴然不爲塵勞之所危害也其土  
平等如柔軟衣無有惡趣音聲誨也天人清淨皆解  
微妙志于大乘少求聲聞緣覺之乘心有所念衣食  
室宇所欲隨意悉自然至天人一等無有窮厄匱乏  
者也衣服飲食如兜術天上其國所有等無差特其  
如來壽命滿六十七萬二千歲其土人民壽亦復如  
是無中天者佛土菩薩七十二那術聲聞甚少爾時  
有轉輪聖王號無盡福王十六四天下其無盡福王  
有八十四那術夫人如天玉女有四太后一名離垢  
二曰無垢光三曰清淨四曰淨句子有八萬四千皆

大猛勇身相有八端正姝好皆志大乘彼時無盡福  
王處於大城名曰具樂其城東西長二千四百四十  
里南北亦爾梵首天王如來興於彼國無盡福王建  
立精舍植大林樹名上香光園佛所遊止城之中央  
造王宮殿七寶合成城中八萬四千街巷八萬四千  
欄楯一一街巷有八萬四千家居其大城壁七重七  
重欄楯七重行樹七重交露繞城有萬遊觀園其塹  
七重滿八味水生青蓮紅蓮黃蓮白蓮皆有美香鴛  
鴦鳧鴈相隨而鳴其城如是名等無量不可思議王  
供養佛奉進所安衆事具足無所乏少於百千歲不

可稱限率其宮中子孫親族友黨眷屬國中人民往  
請上香光叢林見梵首天王如來稽首佛足退住一  
面佛告王曰有四事爲大國王君子聖主猶得自在  
與衆不同增益善法何等爲四立於篤信數詣賢聖  
樂欣請益求德慕義以法自娛常觀無常苦空非身  
之法觀世所有有爲之法皆歸離別自攝其心入無  
放逸覺察欲樂無所僥羨不可虧斷宿世福德不廢  
道心務志妙慧是爲四事大國聖主猶得自在與衆  
不同無盡福王白世尊曰菩薩有幾法而得自在佛  
告王曰菩薩有八法而得自在何謂爲八得五神通

以自娛樂未曾有退無所罣礙併除瞋恨而無害心  
具暢聖慧攝乎道明所作已辦見得徹達誠信神足  
拔諸所有智慧聖明捨離一切邪見塵垢得四解明  
佛所建立所著不住具足力處逮乎無盡福海印三  
昧能悅衆生攝御一切諸佛之教以成總持其心清  
淨所聞不忘應如所欲亦爲說法入一義味住於本  
際不計吾我不起法忍是爲八事菩薩而得自在佛  
告王曰又有總持名曰寶事菩薩逮得此總持者於  
法自在時佛爲王說寶事總持之慧滿百千歲普分  
別義王捨國事一切衆緣專精一心及與眷屬聽受

經

佛說海龍經卷一

十

景

道化於百千歲未曾想欲無瞋恨意不念想害不顧  
妻子國土眷屬一切所有永不以計唯願法樂立志  
佛道大慈清淨等心一切而行大哀被大德鎧而聽  
受法如是之比具百千歲受佛誨已因此寶事總持  
之要所作則辦越七百萬劫終始之患積十萬劫除  
諸罪殃見億百千佛從受德本於恒沙等作天帝釋  
若爲梵天轉輪聖王積功累德以清淨心志御諸法  
因心不亂聞百千佛受法不忘時王諸子皆悉逮得  
柔順法忍中宮嫪女八萬四千普發道意爲菩薩學  
八萬四千人逮得法忍九十那術諸天人民皆發無

上正真道意二十六那術學聲聞乘得法眼淨萬六  
千比丘漏盡意解無盡福王棄國捐王不慕天上世  
間諸樂唯志無上正真之道因家之信出家爲道而  
作沙門諸子亦然皆作沙門時國人民見王棄國六  
萬人悉爲沙門中宮嫪女四大夫人亦爲沙門佛教  
清淨寂然安隱植諸德本衆行具足佛言龍王爾時  
無盡福王轉輪聖帝非是餘人則爾身是也爾時轉  
輪聖王諸子今此會中諸菩薩大士是也時彼梵首  
天王如來爲王無盡福所說寶事總持則今佛所說  
無盡藏總持是佛語龍王今如來以無著慧觀察人

經

佛說海龍王經

二

景

本而爲說法從無央數百千億那術諸佛聞無盡藏  
總持以此數聞之故今乃如斯志念強勇獨步無礙  
辯才難及志懷智慧若有菩薩聞是無盡藏總持之  
名其有說者皆當逮得無著辯才所以者何由是總  
持後當來世是離垢總持所流布處皆是如來之所  
建立八萬四千法藏是總持門爲首面也八萬四千  
行皆來歸於總持八萬四千三昧皆從總持八萬四  
千總持無盡之藏總持爲本原佛語龍王假使菩薩  
無住無著於四解義則降大法雨皆來依倚此無盡  
之藏此無盡之藏總持所入正句次第順章諸天龍

神香音神無善神鳳凰神恬柔神皆共營護

緣應意 隨順意 欣慈樂跡 直意 越度 無

盡句 次第 曜面 光目 光英 志造 淨意

行步入 勇力 濟冥 所持爲上 寂門 入

寂滅 離塵離居 居善隨順 離次 無所至

所住 無所住 至處 無至處 要御 速智

慧根 轉本根 月光 日轉 炎光 善離垢

無垢 淨諸垢 覺所建立 諸天祐護 諸魅告

乘 梵知化 釋咨嗟 四天護 衆聖愛 仙人

歸 諸姓修行 解牢獄縛 天人所攝 捨諸塵

勞 破壞衆魔 降伏外道 攝欲明智 開化自  
 大 不犯法師 不亂衆會 悅可樂法者 護於  
 法音 不斷三寶 慈愍衆生 讚慕德義  
 佛告龍王是諸法句爲護無盡之藏總持其有法師  
 受是章句六十二事若諷誦者得三十二無諸所畏  
 何謂三十二博聞無畏咨嗟他人處處無畏言無缺  
 短如應無畏棄捐鄭重畏無所畏隨音所入辯才無  
 畏無所罣礙其心無畏奉受道心其志無畏歡悅衆  
 人行步無畏速決狐疑覺意無畏觀察衆人無闕無  
 畏言行相應無沒無畏戒禁清淨心面無畏忍辱清

淨堅強無畏於審諦願而不轉還所處無畏心不謬  
 亂辯慧無畏能悅衆會智慧無畏知深妙法降化無  
 畏離於調戲師子無畏伏諸外道無受無畏無衣食  
 悅無厭無畏降伏衆賊令住正見無罵無畏智者不  
 毀導御無畏不亂衆經說等無畏隨時而教無諂無  
 畏言行相應離慢無畏敬一切人謙順無畏於無盡  
 句本行修善發遣所問無畏開化一切無量法教隨  
 衆無畏已身淨故降魔無畏除諸塵勞大慈無畏心  
 不懷害大哀無畏將護衆生智慧無畏以法治國佛  
 語龍王菩薩聞是無盡之藏總持歡喜信受便得三

十二無畏假使不斷是三十二無畏稍稍漸成如來  
四無所畏佛之所有無所畏諸天人前爲師子吼恣  
聽一切所可欲問都無有人能來窮極如來之智亦  
不敢斷佛所說是故菩薩欲致是無所畏者當學行  
無盡藏總持何所是總持所學行無眼行無色行無  
眼色識行無耳行無聲行無耳聲識行無鼻行無香  
行無鼻香識行無舌行無味行無舌味識行無身行  
無細滑行無身細滑識行無心行無法行無心法識  
行無色行無色生行無色滅行無色處行無痛想行  
識行無識行無識生行無識滅行無識處行一切無

行是應總持行復次龍王其行色空心不空色是應  
總持行痛想行識其行識空心不空識是應總持行  
復次其無想色行不念無想行是應總持行痛想行  
識亦復如是其無想識行不念無想識行是應總持  
行復次其不斷色行於色行無行不色生行不色起  
行不色寂行色如諦行色如本淨行亦不念色如諦  
本淨行是應總持行痛想行識亦復如是其不斷識  
行於識行無行不識生行不識起行不識寂行識如  
諦行識如本淨行亦不念識如諦本淨行是應總持  
行復次於種由法界行不想法界行不想法界識入

本淨空行不想本淨空是應總持行若一切法緣起之行不想緣起是應總持行不著諸法行不倚不著行是應總持行諸法如本無行不壞諸法本無之行若於諸法住本際行不念本際住諸法行是應總持行復次其知貪欲行不於法界想念貪欲行是應總持行其知瞋恚行不於法界想瞋恚行是應總持行其知愚癡行不於法界想愚癡行是應總持行其知等分行不於等分行於法界有所壞行若於八萬四千諸所修行入於法界無若干行是應總持行若行若合行於行合行而無所行亦無不行所以者何其

行無量亦無所度亦無所想是故彼行爲平等行於平等行亦無所毀亦不有爲亦不無爲亦不受亦無不受無處無住故曰平等行菩薩行如是則得無盡藏總持之門也於是世尊則說頌曰

其人心意則清淨

普入經卷度無極

悉解衆人之音聲

得總持時乃如是

觀知羣萌心所行

善惡所念及中間

分別本淨所造典

則爲說法隨所應

悉了因緣之報應

令不觀常及無常

皆以棄捐墮邊際

分別總持隨順化

明解文字之方便	知無央數之音響
曉了義理微妙法	得總持者乃如是
逮得天眼無垢汗	天耳清淨亦如是
無量智慧知衆行	念億千劫去來事
獲四神足亦如是	至無量國須臾頃
供無數億諸導師	聞所講法則總持
若干數魔至百千	一能觀知境界行
清淨之人無塵冥	講說經法無數千
譬如蓮華不著水	不倚世法亦如是
常以解脫諸有無	等心一切如虛空

持最色相而勇猛	衆人觀仰無厭足
進止安詳行無缺	愍傷羣萌故遊世
天帝釋梵及護世	皆以恭敬稽首禮
其心不以憍慢說	得總持時亦如是
口言柔輒如梵音	爲衆人說可其心
溫潤流利言得時	所可教化無所侵
在於衆中無所畏	爲師子吼妙無難
降伏一切衆庶人	得淨總持爲如是
其諛諂人難調化	興于憍傲而自大
聞彼聖明所說法	卽棄貢高稽首禮

入於本淨寂法界  
以故所說無窮已  
人之本性法界淨  
解知本無人本無  
所盡無盡不可知  
覺了知是趣寂寞  
斯諸文字不處身  
文字本性空寂寞  
計總持者不著字  
以知文字所趣然

以達義歸解諸法  
分別文字知法律  
曉衆生淨亦如是  
所說經法無罣礙  
無盡之事無能盡  
則說無住億經卷  
亦不在意不住心  
譬如山中呼聲響  
無意無言無說聲  
假使所說無罣礙

無意無想亦無心  
又復解知去法慧  
以入分別四句義  
究暢音聲順所聽  
翫習本原承其慧  
所解之慧了逆順  
方便所有諸怯弱  
明識所作爲解說  
其身口意皆已寂  
所言無厭除瞋恨

設有所說無所念  
講順說經隨所應  
曉了義理明識法  
故講無著不可量  
故說深要若干法  
有趣頂法度無極  
以用救攝諸卒暴  
得總持者乃如是  
分別諸慧不著有  
得住總持爲勇猛

佛說海龍王眷屬萬三千龍皆發無上

其所總持心執御 意之所入住法慧

其有聞者未曾忘 順如聽采等經典

其總持義法不亂 計法所之無所入

以法等故曰平等 如應平等順清淨

分別名品第八

佛說此章句偈時海龍王眷屬萬三千龍皆發無上  
正真道意則更啓白廣宣此言唯然世尊我等亦當  
遠是無盡之藏總持也當爲一切衆生之類廣說經  
法爾時賢者舍利弗白佛言至未曾有世尊乃令諸  
龍發無上正真道意人乃不能發大道也佛告舍利

弗是萬三千龍迦葉佛時皆作沙門從迦葉如來一  
反聞菩薩行同時歡喜讚曰善哉善哉說大乘事不  
可思議與族黨知友俱行分衛貪利不順不護禁戒  
以是之故壽終之後墮於龍中彼時從迦葉佛聞大  
乘教讚迦葉佛因由報應德本之緣今聞吾說咨嗟  
大乘讚無盡藏總持皆發無上正真道意舍利弗觀  
是至心之奇特今吾授決恒沙等劫供養諸佛積累  
道品自致得成無上正真道號慧上智上法上梵上  
得成佛時以是四事號世界曰無垢藏劫名大欣皆  
同一劫得成無上正真道最正覺猶如賢劫當興千

佛

授決品第九

於是海龍王白佛言我從初劫住止大海從拘樓秦如來興於世來大海之中諸龍妻子眷屬甚少今海龍衆妻子眷屬繁裔弘多設欲計校不可窮盡唯然世尊如此云何有何變怪佛告龍王其於佛法出家奉律行戒不具現戒成就違戒犯行不捨真見不墮地獄如斯之類壽終已後皆生龍中佛語龍王拘樓秦佛時九十八億居家出家違其禁戒皆生龍中拘那含牟尼佛時八十億居家出家毀戒恣心壽終之

後皆生龍中迦葉佛時六十四億居家出家犯戒壽終之後皆生龍中於我世中九百九十億居家出家若干闍諍習若干行誹謗經戒皆生龍中今有生者佛語龍王以是之故仁者大海中龍諸妻子眷屬不可稱計我般泥洹後多有惡比丘惡優婆塞違失禁戒當生龍中或墮地獄海龍王白佛言於今棄家爲道犯戒比丘墮於龍中者有何殊特佛言棄家學行於今犯戒比丘墮龍中者行於方便不能清淨又有至心信於佛法以至心力龍中壽終生天上人間當見賢劫所興諸佛皆當見之假使不以解脫者悉於

跋陀劫泥洹除志大乘者龍王且觀佛教廣大因緣  
出家之奇特棄諸惡法得超異類爾時有龍王子號  
曰威首前白佛言至未曾有世尊親近如來難值難  
聞雖有所毀作衆罪殃發一善意心念佛法終不失  
德緣是之行至得滅度今我願發無上正真道意用  
佛世尊難值難聞令菩薩行無有違缺至於道場莫  
使心中忘失德本大慈大哀大喜大護所生之處常  
見諸佛得聞經法供養衆僧開化衆生時世尊告威  
首龍王子曰善哉善哉仁者之問乃發救護一切之  
心今汝至心興無極哀而起道意緣彼德本如來嗟

嘆七日七月若至一年爲功德福而不可盡所植善  
行乃如是也佛見威首龍王子心之所念卽時欣笑  
諸佛笑法無央數色色各異光光從口出照不可計  
諸佛世界遶身三帀還從頂入爾時賢者阿難以偈  
讚佛

百福功德莊嚴身	體諸相好三十二
清淨無垢如月光	今之所笑何歡欣
淨無塵埃離三垢	如百葉華行無倦
天人龍神所奉敬	安住今者何因笑
善哉平等齒普淨	十力威曜面香潔

已除生死之根原

今者世尊笑何感

心如虛空無瑕穢

意等善友及怨家

持志如地無憎愛

惟願世尊笑何欣

音聲所講踰梵天

猶雷哀鸞微妙響

所語柔軟莫不歡

惟願世尊笑所因

心如聖慧無所著

知三世人意所行

解衆人根得喜悅

導師今笑爲何感

以爲成醫王

療治衆生病 能施究竟安

世尊笑何緣

護德爲我說 諸天人民間

皆當懷喜踊

卽志諸通慧

佛告賢者阿難寧見威首龍王子住於佛前至意發  
 無上正真道不阿難對曰唯然已見佛言是威首龍  
 王子過八百不可計會無央數劫當得作佛號慧見  
 如來至真等正覺世界名淨住劫曰明察是龍王子  
 至誠奉行菩薩之道見無央數諸如來供養奉事當  
 修梵行開化度脫無量衆生使立三乘慧見如來淨  
 住世界豐熟安隱五穀平賤快樂難量天人充滿猶  
 如燄天被服飲食其佛當壽百萬歲賢聖衆僧聲聞  
 有六十億菩薩百三十萬慧見如來其有覲者皆得  
 慈行三昧慧見如來說經聲聞行者若始見佛則得

道跡再見得往來三見得不還四見得無著志菩薩  
 乘者適觀慧見如來得柔順忍再見獲神通三見得  
 總持辯才四見得不起法忍淨住世界無毀戒者意  
 淨無邪皆住正見壽終之後無有惡趣悉生天上清  
 淨佛土時威首龍王子聞佛授決歡喜踊躍善心生  
 焉奉百千珠瓔用散佛上而又十指以偈讚曰

人尊無垢如月光

威神無量衆所奉

其力無限總持勢

願稽首禮無邊慧

慈悲之聖不可限

徹智無瑕不可議

禁戒廣普住正定

稽首人尊如虛空

無量無限億劫數	所行究竟無可入
以故曉知諸衆生	心性所歸諸根本
若人觀尊顏容	一心察之無厭足
不爲塵埃之所惑	愛欲之穢皆滅盡
哀鸞拘夷諸鬼神	梵天之音亦如是
聲聞十方甚微妙	如來之音超於彼
譬若如日墜於地	海水當竭須彌壞
虛空尚裂地反覆	世尊所說終無異
世尊至誠以諦說	授我之萌大聖慧
吾無狐疑結網除	得佛自在爲衆祐

十方無量億佛國

滿中珠寶供導師

假使有人發道心

前所植德不及此

供養正覺德第一

若人志發尊佛道

則為報恩於十力

用不斷此導師命

龍王子說此偈讚佛已十千人皆發無上正真道意  
悉說是言慧見如來逮得最正覺時吾等同心共生  
淨住世界奉彼如來正法之教又供養之佛滅度後  
次補其處得最正覺佛皆授決悉當令生淨住世界  
佛說海龍王經卷第二

音釋

憺怕

憺徒覽切怕傍各切

湊

聚食奏切

髦

莫高切

脾

彌頓切

藏也

齋

徂奚切

脇

虛業切

尻

苦刀切

髻

髮也香切

髓

忍毗切

切膝也

踰

市亮切

跌

方無切

昵

尼質切

塹

慰武切

篋

苦協切

苞

班交切

繒

帛也疾陵切

塹

七豐切

僿

也

堅堯切

澈

俞芮切

謬

乖誤切

蒞

必列切

蒞

也

佛說海龍王經卷第三

景三

西晉三藏法師竺法護譯

請佛品第十

爾時海龍王白世尊曰唯佛加哀諸天龍神及無量人令致安隱至於大海詣我宮中屈神小食所以者何大海之中有龍鬼神香音神及餘無數衆生之類見如來已皆植德本悉當往會因聞法音除斷無底生死之源吾等龍宮亦蒙其恩天上世間緣得度脫如來普現佛大道心令我等身近道品法佛愍龍王默受其請及無量人悉當廣植衆德之本時海龍王

見佛就請歡喜踊躍稽首佛足右繞三匝與眷屬俱  
忽然不現還在大海聚會宮中而告之曰吾明日請  
佛佛垂矜許汝等同心當具供養海龍王又告燕居  
無善神誑惑縛離垢錦等曰諸仁當知如來降神  
當詣此海乎宜用身故率諸眷屬來集吾宮獻饌世  
尊又勅龍王名曰主度王歎無量王離垢王燄光王  
戲樂王清淨王妙曜意王現諸難王及餘龍王百千  
之衆悉當來會至吾宮裏奉覲如來及勅龍子威首  
曰仁者至敬班宣吾命於無焚龍王令詣海宮供養  
如來至真等正覺卽時受教又勅龍王子強威詣安

明山頂請歡喜龍王那歡喜龍王及天帝釋使諸仁  
者令詣大海集吾宮內供養如來時強威卽時受教  
宣命如是時海龍王化作大殿以紺瑠璃紫磨黃金  
而雜校成則建幢旛造金交露寶珠瓔珞七寶爲欄  
楯而極廣大若干種香而以熏之散衆色華紛紛如  
雪於大殿上化立師子之座高四百八十里皆以衆  
寶而共合成敷無數百千天繒以爲宛綻諸菩薩及  
比丘衆所坐師子座各各嚴麗階級殊別饌具兼重  
若干種味寂然飲食供設以具爾時龍王明旦修敬  
任安明山十二之坎與眷屬俱遙請世尊以偈頌曰

經  
佛說海龍王經

二

景

殊特慧無量	於法得自在	明智成眾事
如空聖無限	離垢明清淨	於世為最上
日時今已到	唯加哀自屈	清淨音如梵
柔輒聲仁和	響雷如哀鸞	為眾現甘露
除若干塵冥	為眾最上醫	人中寶願來
今正是其時	心調柔寂寞	志輒常安和
自度濟眾生	願救諸人民	開化眾黎庶
使越彼四瀆	造安度彼岸	唯屈今是時
調仁樂布施	學道戒清淨	忍辱力最上
已獲大精進	滅除禪脫門	智慧普無量

言誨如月明	枉聖時已到	智跡分別路
邪徑永已斷	七覺意根力	化現以四諦
平等四意止	四神足意定	總得普通達
時到宜屈神	三十二相明	英妙百功德
為存得義者	示現大福田	尊稱為眾祐
如春萌滋茂	唯慙傷加慈	大哀自屈神
志如須彌山	心等譬如地	除愛及瞋冥
所說如演空	人尊不自卑	未曾有貢高
歸于空脫門	屈神今正時	知義尋分別
曉了隨順要	究暢解經法	心行常知時

經

佛說海龍王經

三

二

顯進人本性 觀察諸慧義 稽首最勝足  
 時到屈神臨

爾時世尊遙聞龍王啓白時到告諸比丘著衣持鉢  
 當詣大海開化衆生就龍宮食比丘應曰唯然於時  
 世尊與諸菩薩比丘衆俱眷屬圍繞踊在虛空身放  
 大光明而雨天華百千伎樂相和而鳴集于海邊至  
 欣樂園有思夷華名曰意樂佛住止彼時海龍王往  
 詣佛所稽首佛足陳敬以畢却住一面龍王自念吾  
 欲化作寶階從海邊至海底令佛及比丘衆及諸菩  
 薩由是下海至我宮中如昔世尊化作寶階從忉利

天至閻浮利適設此念便從海邊化作三道寶階金  
 銀琉璃下至其宮甚微妙好爾時世尊以威神力化  
 大海水令不復現使海生類不以爲患佛身放光照  
 于大海普至三千大千世界其海居類身蒙此光皆  
 懷慈愍柔仁之心不相燒害相視如父如母如兄如  
 弟如子無異於時欲行天人色行天人侍從世尊欲  
 聽道化猶欲觀龍王莊嚴宮殿時佛與諸菩薩及大  
 聲聞諸天龍神香音神無善神鳳凰神山神恬柔神  
 釋梵四天王從欣樂園思夷華樹欲詣龍宮佛昇寶  
 階陟於中階諸菩薩衆住於右階諸大聲聞住在左

階時六十億釋而在前導六十億梵天皆在虛空各執寶蓋六十億天皆在佛後而雨天華六十億諸欲天人作諸妓樂而供養佛六十億魔眾皆於佛前香汗灑地六十億龍后在虛空中各現半身手執珠璣垂散佛上六十億山神皆鼓妓樂歌佛功德六十億香音神手執華蓋以用奉佛六十億無善神各持若干百千種衣以覆佛上無焚龍王與億百千眷屬在於虛空皆以華香雜香擣香作眾妓樂莊嚴諸龍及諸天華以供養佛如是比類六萬龍王皆供養佛欲見世尊觀海龍王安樂世界無量壽如來佛土菩薩

號光世音大勢至大士與無央數億諸菩薩俱為佛世尊示現莊嚴諸所有供養皆令前所嚴供隱蔽不見無能知者燄氣世界難逮如來佛土菩薩號法英法首大士妙樂世界無怒如來佛土菩薩號香首眾香首大士照明世界月辯如來佛土菩薩號師子師子音大士不眴世界善目如來佛土菩薩號導御諸法自在大士光耀世界普世如來佛土菩薩號寶場寶燄大士樂御世界寶首如來佛土菩薩號慧步慧見大士光察世界普觀如來佛土菩薩號雨王法王大士愛見世界尊自在王如來佛土菩薩號退魔石

魔王大士取要言之如是十方各各無央數億諸菩薩皆來歡樂海中龍王欲見如來供養奉事於是世尊以大道力諸佛感動威德所鑒以佛弘威勸化無戲供養諸佛放大光明徹照十方無量世界以佛洪音大師子吼而講言化諸天百千皆作音樂而雨天華滅諸惡趣施於一切安隱之具有三昧名曰立於大哀歡悅羣萌以佛三昧正受已所作莊嚴光飾大海不可思議佛從寶階降神海宮自然音樂普聞十方無量世界佛之威神如來所感皆見能仁如來下于大海彼時億百千玉女魔妻無善神鳳凰神山神

恬柔神羣神婦女皆以妓樂而行迎佛調諸音樂而歌頌佛德

施上戒清淨	忍力慈心尊	精進勤御義
禮樂禪脫門	心淨光慧智	嚴明奮威神
現在示解脫	故來除垢塵	施以甘露安
導御罄衆穢	無盡德如空	慧海願降海
所說具足要	讚歎度無極	施眼明清淨
一切人中上	歎頌深義句	愍人光無倫
等祠所宣著	降伏諸異道	施以法無慳
講經淨欲塵	讚歎寶慧光	道財敷演珍

佛說海龍王經卷三

六

景

見諦莫不受	正觀斷結著	不動如山根
願稽首導師	諸天金翅鳥	須倫真陀羅
迦留鳩桓師	願稽首足下	尊相三十二
無比妙善現	體柔紫色	爪足下安平
妙響如哀鸞	其聲踰梵天	大音超三千
稽首柔輓音	根調心寂寞	猶如月電光
言誠常平等	願稽首樂法	已度老病苦
救一切令脫	得勝伏眾魔	滅除生現盡
無著蠲塵勞	為諸天所敬	歸尊普救護
導師開化眾		

十德六度品第十一

於是王女及諸龍后無善神鳳凰神山神恬柔神后  
 共讚佛已一切同等皆發無上正真道意脫身嬰珞  
 用散佛上佛與眾俱降于大海到其海域諸海龍王  
 莊嚴大殿坐師子座時諸菩薩及比丘眾各各次坐  
 其座於時海龍王與中宮眷屬俱見佛坐已手自斟  
 酌寂然飲食無央數味供養佛及比丘僧飲食畢訖  
 行澡水竟坐佛前聽經及諸天龍神香音神無善神  
 鳳凰神恬柔神釋梵四天王及十方諸來會菩薩於  
 是佛見眾會坐定從身放光光名善度說法柔和悉

經

佛說海龍王經卷三

七

三

照大海諸居之類上中下品普目見佛歡喜踊躍願樂聞法各以恭敬遙稽首佛爾時世尊告海龍王倚世間者作若干緣心行不同罪福各異以是之故所生殊別龍王且觀衆會及大海若干種形顏貌不同是諸形貌皆心所盡又心無色而不可見一切諸法誑詐如是因惑與相都無有主隨其所作各各自受譬如畫師本無造像諸法如是而不可議自然如幻化相皆心所作明者見諸法因惑與相則當奉行諸善德者其解惑相與成諸法陰種諸人當歡喜悅得好端正龍王且觀如來之身以百千福而得合成超

經

佛言海龍王經卷三

十一

景

於衆會普現巍巍其百千德由得自在而使梵釋覆蔽不現觀如來身自視不敢當其威光察諸大士色身相好莊嚴具足皆以善德校飾其體佛語龍王仁所嚴淨皆因福成諸釋梵天龍鬼神香音神無善神鳳凰神山神恬柔神所有莊嚴皆因福生今之大海若干種身善惡大小廣狹好醜強羸細微皆自從心而已獲之爲若干貌悉身口意之所作爲是故龍王自護身行救濟罪福當作是學汝等以護身行救濟罪福奉行諸善得成佛道滅棄邪見不住有常無常之見當求衆祐已植供養因供養故當爲諸天世人

經

佛言海龍王經卷三

八

三

所敬佛語龍王菩薩有一法皆斷一切惡趣衆難何等一專察妙法云何正諦入於法樂多觀善法不聽諸惡衆邪之想已斷惡法奉行衆善在所生與佛菩薩賢善性俱佛言何等善法已立德根天人之安不爲聲聞緣覺之本立道本者志無上正眞道何謂立本謂行十事何謂十身不殺盜婬口不妄言兩舌惡口綺語意不貪恚癡是謂立本佛語龍王人不殺生得十善寂法何謂十常施安隱於一切人常樂慈心斷瞋恨心所生之處常無疾病常種長命爲非人所護卧安寤歡未曾惡夢不懷怨結不畏惡趣壽終

之後得生安處人不殺生得斯寂法已不殺生善本之德願志無上正眞之道若成佛時而得自在於壽命也佛告龍王人不盜竊得五信法何等五得大財富無有縣官水火盜賊怨家惡子能竊取者衆所愛敬所至到處寂然無難患畏永除以不取之福志存惠施植衆德本已願無上正眞之道已依如來無見之慧成最正覺使立神通佛語龍王人不犯邪婬得四明智所歎之德何等四攝護諸根調戲一切世間悉共稱歎已離邪婬無敢輕眄其妻室者以是德本志願無上正眞之道得大人相陰馬之藏佛語龍王

人不妄語諸天世人以八法歎何謂八得面清淨語  
言中當一切世人所見任信自成其證天人所敬心  
懷至誠而無邪想心意清淨而無諛諂多所歡悅無  
患厭者能受禁誨無有麤言生天上人間獨見信任  
無有疑者以至誠言善德之本志願無上正真之道  
因此所行常得至誠佛語龍王人不兩舌得五不別  
離何等五身不別離無散亂者眷屬不散不教他人  
得信無壞見於緣報他無壞法以行為要得親友和  
用無欺故以是德本求最正覺得成如來眷屬無亂  
一切衆魔及與怨敵終不能壞如來眷屬佛語龍王

經

佛說阿含經卷三

九

景

人不惡口得八清淨言辭之報壽終之後得生天上  
何等八所說如諦所言柔軟所言如應所言和順所  
言能受所言光曜所言衆人莫不承樂所言衆所不  
譏因是德本志願無上正真之道得成如來音聲超  
梵佛語龍王人不綺語得三正行何等爲三常爲衆  
明諸等敬愛心常專一入于至誠不以多言於天上  
人間常得大尊不爲雜碎以是得本志願無上正真  
之道爲佛所授決得成如來所言無異佛語龍王人  
不嫉妬得五威神何等五身口意明諸根具足得極  
財富而以自恣降伏諸怨樂於飲食美味生活之業

經

佛說阿含經卷三

十

三

福德巍巍爲諸國王所見恭敬而蒙覆蓋如已所有  
微妙之寶致差特家功德宿本不嫉他財因是德本  
志願無上正真之道成等世尊三界所奉佛語龍王  
人不瞋恚得人心歡喜法何等爲八無害樂諦滅除  
瞋恚樂于誠實心不樂諍心樂質直安庠而和等於  
聖賢常懷慈心愍傷具足見人安悅湍正姝好衆人  
所敬生於梵天不以爲難心以方便哀和之故是爲  
八因是八德本志願無上正真道意得爲如來至真  
等正覺觀無厭者佛語龍王人不邪見得十德法何  
等十志性真實得人善友信善惡之報若已沒命不

續  
佛說勝鬘經卷三

景

傷犯人念行佛道心無有異不事天神志懷質朴捨  
於諛諂神呪之術與諸天人以爲朋友不與地獄餓  
鬼畜生而作伴侶與衆特異功德巍巍聖道爲上離  
於邪見離於貪瞋離於惡見都無罣礙與聖平等須  
臾之間生天上人間是爲十德法以是離邪見得本  
志願無上正真之道得近諸佛道法速逮神通成爲  
如來佛語龍王菩薩離於殺生而行布施常得大富  
長壽無極行菩薩道一切外怨莫能當者已離盜竊  
而布施者旣饒財寶人不敢取行菩薩道無能妨廢  
合聚一切功德之法離於邪婬而布施者後常大富

經

佛說勝鬘經卷三

上

三

妻無汙態在於人間無敢犯者其家女人而不色視  
離於妄語而布施者常大富有不被誹謗以下劣人  
皆蒙擁護行菩薩道言行相應所願堅強離於兩舌  
而布施者常大富有眷屬不別行菩薩道則得菩薩  
一切眷屬質直等性已離惡口而布施者常大富有  
所言人受行菩薩道入於衆會莫不欣樂離於綺語  
而布施者常大富有所言輒行行菩薩道斷一切疑  
離於嫉妬而布施者常大富有喜好衣食牀卧具足  
行菩薩道已所喜者而以加施得大尊豪離瞋恚心  
而布施者常大富有威耀端正所說者衆人愛樂

行菩薩道心無加害諸根具足離於邪見而布施者  
常大富有立於正見生於族姓值佛世尊行菩薩道  
不離諸佛常得聞法發菩薩心佛語龍王是謂十善  
布施莊嚴廣大乃爾此十善行以戒莊嚴以自具願  
得諸佛法以忍莊嚴諸相種好成佛音聲以精進莊  
嚴降伏魔怨以佛道法有所超度以禪莊嚴心意所  
趣而以清淨以智慧莊嚴除諸住見行慈莊嚴當以  
仁和不害衆生行哀莊嚴不捨黎庶行喜莊嚴無懈  
厭心行護莊嚴得無所著斷諸疑結行思莊嚴勸化  
羣萌行意止莊嚴止身諸痛痒心法具足意斷莊嚴

斷諸惡法具足善德神足莊嚴身心輕舉五根莊嚴  
堅固其行以上精進而無放逸以心修治除諸塵勞  
五力莊嚴以質直心降化衆怨覺意莊嚴曉了諸法  
如本所由八路莊嚴懷來正慧寂然莊嚴滅除一切  
諸垢塵勞以觀莊嚴觀諸法本審諦悉無善權莊嚴  
有數無數有爲無爲具足安隱佛語龍王取要言之  
十善之德具足十力四無所畏成諸佛法以是之故  
於是十善之德廣普莊嚴常當精進譬如郡國縣邑  
村落丘聚百穀藥草樹木華果種植刈穫皆因地立  
十善之德天上人間皆依因之若學不學及得果證

住緣覺道菩薩道行諸佛法皆由從之於是海龍  
王白世尊曰何謂入法門菩薩所行入法門者除於  
宿世陰蓋之罪已除陰蓋得至超異佛語龍王菩薩  
有一法除諸罪蓋何等一立於擁護不捨所說悔過  
首罪復有二法除諸罪蓋何等二常觀淨法不造現  
在復有三法除諸罪蓋何等三入因緣慧具足悅心  
依本淨法了知本無復有四法除諸罪蓋何等四曉  
了於空不住無相趣於無願慧無所造復有五法除  
諸罪蓋何等五無我無人無壽無命無識復有六法  
除諸罪蓋何等六歡喜篤信而無狐疑往返進止觀

佛說法華王經卷三  
察審諦所作至誠不失正信是爲六法除諸罪蓋龍  
王白佛何謂菩薩得至超異世尊曰菩薩有十事得  
至超異何等十常念心性情淨善權方便堅強精進  
觀察人物行無極哀修德無厭博聞不倦奉無放逸  
念於道場令得佛慧不捨道心是爲十事菩薩所行  
得至超異

燕居阿須倫受決品第十二

於是燕居無善神白世尊曰何謂菩薩超諸德上佛  
告無善神菩薩有八法超諸德上何等爲八菩薩於  
是離於貢高爲一切人下屈謙敬受教恭順言行相

副謙順尊長一切德行諸法爲本所行堅強超諸善  
德樂於微妙若干種施寧失身命不求人便見有危  
懼施以無畏來歸命者不以捨棄求於一切福慧之  
業不以厭足是爲八法無善神又問佛言菩薩有幾  
法行得身長大面部弘滿眷屬繁熾意廣無極佛告  
燕居無善神菩薩有四事得身長大何等爲四不說  
他人所作貪嫉作佛形像根相具足和合離別勸令  
志於無上正真之道向於衆生無傷害貌是爲四得  
身長大菩薩有四事面部弘滿若干嬰珞而用布施  
一切所愛施而不惜常以慈眼觀於如來見人端正

不生嫉妬是為四事得面色弘滿菩薩有四事得眷屬繁熾何等四離於兩舌未曾破壞他人眷屬見他友黨代其歡喜不捨道心并化他人令發道意是為四菩薩有四事意廣無極何等為四其心清淨而無諛諂除重愛欲所在中間而無厭疲志於微妙深入要法一切諸法本末皆空是為四事菩薩意廣無極於是燕居無善神與三萬二千眷屬各各以若干種八千天華散世尊上以偈讚曰

其有於十方 人種不可量 須臾一時頃  
則供養世尊 假使十方人 一切供養德

在於百千劫	等心給足之	不能及慈心
愍傷之福行	寂然極如應	供養安能報
是為諸十方	供養之奉事	發心無與等
正諦住如應	於是吾自由	立志無諛諂
已覺了本無	自致得佛道	人中尊見愍
三界無證我	十力證明我	解我心性行
柔軟無虛弱	以離諸恐懼	布施調禁勝
持戒及忍辱	精進于定意	為應住智慧
順從慈愍哀	常奉至誠行	加哀不為我
勝不受吾決	人尊我便當	自剎受佛決

何言汝前三經卷三

三

景

吾志不狐疑	謂不成自由	吾了了究竟
志淨在於道	人中尊時笑	月英尋問曰
今何故欣笑	唯聖解說之	化度時告曰
月英具聽之	吾所以示現	奮出大光明
時燕居廣普	志願尊大道	三萬二千人
諸所從眷屬	於百千劫中	常行菩薩道
一切心同等	當得聖佛道	當供養諸佛
等如恒邊沙	所開化人民	其數復過此
其劫曰歡喜	又號淨復淨	得佛離寂塵
覺了至無憂	此燕居廣普	當逮為法王

超出精進力	號曰帝旛幢	其世界名曰
欣樂仁莊嚴	衣食豐平賤	譬如兜術天
其十力壽命	七十億萬歲	滿六十那術
比丘比丘尼	諸菩薩之衆	有八百那術
堅住於總持	所聞悉解了	彼於歡喜劫
又號淨復淨	皆以如是比	當成尊佛道
開化百千人	悉使住佛道	具觀是德勝
菩薩之道心	燕居無善神	彼聞佛受法
四千萬大衆	悉發菩薩心	三千界震動
則時雨天華	善哉總要德	心意之差特

經

第九卷之三

七

三

無焚龍王受決品第十三

於是無焚龍王白佛言一切諸法皆無所住亦無有人何有受決者誰當成至無上正真道為最正覺乎佛言如是如仁所言一切諸法皆無所住亦無有人一切諸法亦復如是凡夫愚人處於顛倒住吾我人無人起人想菩薩發大哀為除顛倒去吾我人被覺德鏡此正士等曉了諸法無吾我人開化誘立吾我人命屬仁所云誰受決者諸仁等解人空無我則為受決一切法等觀諸法寂則為受決諸佛國等而無所取心淨無垢則為受決慧觀諸佛等諸佛道不壞

法界則為受決於諸魔眾等一切魔於塵無塵了心本已則為受決無名無相無應不應無念不念不受不捨則為受決佛語龍王其心意識無所住立則為受決諸法如是以無因緣諸法本諦覺了諸法平等無異則成無上正真之道究竟求本無有受決及成佛道若受決者若受決已所以者何諸法無形本末悉斷皆無有主一切諸法從因緣轉諸法如空無從生相故諸法無從生相無所至相故諸法無所從來計本空故諸法無所至未發起故諸法無所住不可得處故諸法悉空用無身故諸法無著用無倚故諸

法無所倚不可動故諸法不可動無處所故諸法皆  
如用自然故諸法自然無言教故諸法無言教無色  
像故諸法無色像用無念故諸法無念無因緣故諸  
法無因緣無所行故諸法無所行用寂然故諸法寂  
然無受陰故諸法無受陰本淨空故諸法無相用無  
二故諸法無二用本一故諸法本一離若干故諸法  
等差特用等覺故佛語龍王解諸法等無受決者不  
成等覺且觀于是如來堅固無極哀及諸菩薩勸  
樂之力諸法如是以無央數爲人解說合會有數於  
諸法觀無解脫人法亦不度人如法者人亦如也道

亦如也佛亦如也決亦如也諸法亦如也故曰如來  
了於本無住本無故而不可動故曰本無本無無像  
本無無壞解了本無故曰如來以如來故等住本無  
諸法如是等如本無住是爲如來等住之地其有菩  
薩聞是說者不忍不怖不畏不難以是如來等住之  
地爲人解說佛說是時三千菩薩皆得法忍阿耨達  
龍王歡喜踊躍以自珠瓔珞價當是世而覆佛上  
寶錦受決品第十四

爾時海龍王有女號名寶錦離垢錦端正姝好容顏  
英豔與萬龍夫人俱各以右手執珠瓔珞一心視佛

目未曾眴禮佛而立時寶錦女及萬夫人以珠嬰珞  
奉上世尊同音歎曰今日吾等一類平心皆發無上  
正真道意吾等來世得爲如來至真等正覺當說經  
法將護衆僧如今如來於時賢者大迦葉謂女及諸  
夫人無上正覺甚難可獲不可以女身得成佛道寶  
錦女謂大迦葉心志本淨行菩薩者得佛不難彼發  
道心成佛如觀手掌適以能發諸通慧心則便攝取  
一切佛法女謂迦葉又如所云不可以女身得成佛  
道男子之身亦不可得所以者何其道心者無男無  
女如佛所言計於目者無男無女耳鼻口身心亦復

如是無男無女所以者何唯仁者眼空故計於空者  
無男無女耳鼻口身心俱空如是虛空及寂無男無  
女若能解了分別眼本則名曰道耳鼻口身心亦復  
如是計於道者無男無女法是故迦葉又如諸法皆  
在自然道亦自然吾亦自然迦葉問女汝是道耶其  
女答曰尊者耆年謂我非是道乎迦葉答曰吾非佛  
道是聲聞耳女又問曰誰開化仁答曰如來女曰假  
令如來不成正覺寧能開化於耆年不答曰不也是  
故仁者當知在彼則爲以道無不覺道迦葉問女逆  
爲道乎答曰唯然迦葉逆則道也所以者何以別本

淨可覺了道者則無有逆解逆本淨則名曰道空者  
本無分別諸逆則名曰道假使諸法有合有散則非  
道也等一切法順如應者乃爲道耳迦葉問女誰以  
如此辯才相施女答曰尊者迦葉施我辯才設使仁  
者不問於我何因發辯譬如迦葉無有呼者何緣響  
應假使無問菩薩義者無因發辯迦葉問女汝爲供  
養幾何佛乎女答曰如仁者所斷塵勞迦葉答女曰  
吾不斷塵勞女又問仁者續有塵勞穢耶迦葉答曰  
吾無塵勞亦不斷矣女又問曰安置諸塵勞答曰不  
起不滅亦無所置所解如此如本無也又問本無寧

可知耶答曰不也又問何故言仁其慧如道如所知  
了明無爲知如此如解本無是故名曰慧與凡夫等  
又問女汝所辯者斷一切言答曰吾無所斷亦無有  
言所以者何法界無所斷一切所說皆應法界迦葉  
又問女汝等我於凡夫法寧不有疑乎女答曰假使  
立仁凡夫慧法而各異者吾當有疑吾謂仁者凡夫  
無異以故無疑諸法皆等無若干故是謂平等如  
虛空是謂平等又問女汝於凡夫等聖賢耶答曰吾  
不凡夫亦非聖賢所以者何假使吾等身與凡夫等  
不行菩薩設使賢聖等則斷佛法又問女設汝不與

凡夫等亦不與聖賢等寧與佛等乎女答曰不也所以者何吾身本於佛法等又問女曰假使汝於佛法等者寧逮佛法乎女答曰仁者耆年寧信佛法有去來今現在緣耶有方面乎有所處青黃赤白黑不答女曰諸佛之法無有形見女答曰假令諸佛法無有形見云何從我求乎迦葉問女佛法當於何求答曰當於六十二見求又問六十二見當於何求答曰當於如來解脫中求又問如來解脫者當於何求答曰當於五逆中求又問五逆當於何求答曰當於度知見求又問此言何謂女答曰無縛無脫無取無捨此

爲本淨是爲諸法之深教言非若干言又問女是之言教不違如來言乎女答曰是真諦言不爲違失如來之教所以者何如如來之道而無所得亦不可持亦無言說一切所言皆音聲耳曉了道本亦無音聲唯仁者解道寂然無跡以名跡自愛跡迦葉又問假使道無跡如是比相云何成最正覺答曰亦不從身亦不從意得最正覺所以者何身心自然乃成道耳其自然者都無所覺吾則是道不以爲道成最正覺迦葉問女設汝是道何不轉法輪女答曰我轉法輪耳迦葉問曰所轉法輪爲何等類女答曰無動之輪

遠離一切諸所倚住其法輪者諸法界住故本無輪者順本無故無斷輪者如本淨住故無著輪者覺了一切諸法無所著故無二輪者等於一切法故無若干輪忍一行故無言法輪化諸音聲皆無所想入一味故清淨輪者一切無塵故斷諸不調輪不得有常無常無所住故無亂輪者善觀報應故至誠輪者無起無滅故空無輪者無相無願故惟迦葉輪已如是何所轉者大迦葉曰如女之辯才不久當成無上正真道最正覺女答曰假令迦葉成最正覺時吾亦當成最正覺迦葉答曰吾終不得成最正覺女答曰如

是了法身者道住無所住無能得致成最正覺者女說是語時五百菩薩逮得法忍佛時讚曰善哉善哉快說此法爾時衆會中天龍鬼神無善神香音神心自念言是寶錦女何時當成無上正真道最正覺佛知諸天龍神香音神心之所念告諸比丘此寶錦女三百不可計劫後當得作佛號曰普世如來至真等正覺世界曰光明劫曰清淨其光明世界如來光常當大明菩薩九十二億佛壽十小劫於是萬龍后白佛言普世如來得爲佛時吾等願生彼國佛卽記之當生其國

天帝釋品第十五

於是天帝釋白世尊曰此忉利天帝懷恐懼難無善  
神天與無善神共戰鬪時展轉共諍懷其怨結各有  
瞋毒惟願世尊慈愍衆生諸無善神皆悉來會此諸  
忉利天悉令共和佛告燕居無善神誑詐超度離垢  
錦無善神言諸仁者其仁慈心諸佛所歎人能行慈  
現世後世具足利義其命甚短當就後世合會有離  
國土豪貴皆歸無常汝等之身不免此患當觀後世  
和順同心無得懷瞋將護罪福因緣之對於是世尊  
爲說辛酸悲哀之言使無善神及忉利天悉共和解

各自說言吾從今始當爲親友順於等行各各當懷  
慈心愍哀無瞋恚意佛言善哉善哉諸仁者是則第  
一供養如來用行慈故說是語時所教造福共和不  
諍謂慈心三昧有四事尊敬如來何等四不違犯戒  
身口意慈不斷三寶志於佛道如所聞法爲人講說  
是爲四事尊敬如來爲供養於是會中二萬二千天  
無善神聞說此言皆發無上正真道意  
佛說海龍王經卷第三

音釋

矜

居陵切  
憐也

統紵

統於阮切  
紵以然  
切統紵坐褥也

級

居立切  
階次也坎

苦  
感

佛說海龍王經卷第三

三

身三

切坑陟登也眇竹力切眇松閏切斟斟酌深切狹胡夾切

羸力追切眇彌箭切泆弋質切態他代切痒余兩切

也欲搔也刈刈牛制切穫胡郭切收收穫也豔以瞻切好好也

佛說海龍王經卷第四

西晉三藏法師竺法護譯

金翅鳥品第十六

爾時有龍王一名喻氣二名大喻氣三名熊羆四名無量色而白世尊曰於此海中無數種龍若干種行因緣之報來生於是或有大種或有小種或有羸劣獨見輕侮有四種金翅鳥常食斯龍及龍妻子恐怖海中諸龍種類願佛擁護令海諸龍常得安隱不懷恐怖於是世尊脫身皂衣告海龍王汝當取是如來皂衣分與諸龍王皆令周徧所以者何其在大海有

經

佛說海龍王經卷第四

一

身四

值一縷者金翅鳥王不能犯觸所以者何持禁戒者  
所願必得爾時諸大龍王皆懷驚懼各心念言是佛  
皂衣甚爲少少安得周遍大海諸龍時佛卽知諸龍  
王心所懷疑恐告海龍王假使三千大千世界所有  
人民各各共分如來皂衣終不減盡其欲取衣譬如  
虛空隨其所欲則自然生佛所建立不可思議巍巍  
之德其如斯矣時海龍王卽取佛衣而自分作無央  
數百千段各各部分與諸龍王龍王之宮隨其所之  
廣狹大小自然給與其衣如故終不知盡於是海龍  
王告諸龍王當敬此衣如敬世尊如敬塔寺所以者

何今此衣者如來所服以是之故如敬塔寺也假使  
一切供養如來有奉此衣等無差特於是世尊告海  
龍王如是如是如仁所言其奉此衣則供養如來且  
觀諸龍及龍妻息各各所分如來衣不對曰唯然已  
見佛言我皆授決卽脫龍身於是賢劫修志大乘其  
餘諸龍皆得無著當般泥洹如是諸龍王如來在世  
一切衆祐發一善心緣當致佛未嘗有失爾時海中  
諸龍及龍妻息欣然大悅自投佛前同音說言如來  
所語終無有二至誠不虛授我等決至無爲度吾等  
今日住於大海歸命佛法及諸聖衆奉受禁戒恭順

如來反復之義如來現在數數往造見佛稽首聽採  
法義般泥洹後供養舍利一切衆具而以奉事世尊  
舍利於是四金翅鳥王聞佛所建立惶懼速疾往詣  
佛所前稽首足何故世尊奪吾等食佛言都有四食  
坐趣三處何等四一曰網獵禽獸殘害羣畜殺生枉  
命以爲飲食是趣惡處二曰執帶兵仗刀矛斫刺逼  
迫格射劫奪他財以用飲食是趣惡處三曰慳貪諛  
諂憤亂犯禁邪見巧欺而以得食是趣惡處四曰非  
師稱師非世尊稱世尊墮邪稱正非寂志稱寂志非  
清淨稱清淨非梵行自稱梵行自稱詐求而以得食

是爲四食坐趣地獄餓鬼畜生三惡之處吾所說法  
除此四食不當以此養身害衆生命所以者何一切  
衆生各自愛命無自憎者以是之故欲自護身當護  
他人安隱衆生明者如是不以危逼人所不當作慎  
勿爲也爾時四金翅鳥王各與千眷屬俱而白佛言  
今日吾等自歸命佛及法衆僧自首悔過前所犯殃  
奉持禁戒從今日始常以無畏施一切龍擁護正法  
至佛法住將順道法到于滅盡不違佛教佛告四金  
翅鳥王汝等之身金仁佛時爲四比丘名曰欣樂大  
欣樂上勝上友是四比丘違犯戒法貪於供養志迷

醉惑隨親友種逐於豪貴意亂吾我墮於邪見輕諸  
比丘逼迫惱之不護身口意作惡衆多供養金仁佛  
亦不可計以是之故不墮地獄墮此禽獸前後殺生  
不可稱計多所恐怖用不自護世尊應時卽如其像  
現其神足令四金翅鳥識念宿命所可供養金仁佛  
及諸弟子彼時所作罪福普悉念之目覩悉見前世  
所作白世尊曰其心剛鞫難可調伏坐心貪嫉多所  
危害違金仁尊教我等今始寧沒身命不敢犯惡佛  
爲說經授其決言彌勒佛時在第一會皆當得度  
舍利品第十七

爾時海龍王子及一切龍白佛言未曾有世尊如來  
所說普安一切授諸龍決開化眷屬皆發無上正真  
道意又以加恩乞施皂衣使諸龍分各以供養稽首  
奉事緣是得護因發道意慈愍衆生遵四等心慈悲  
喜護興隆四恩惠施仁愛利人等利一切救濟合聚  
由此行德沙不雨身離於衆患又寂意時不失天身  
變爲蛇虺臨食竟後不遭蝦蟇金翅鳥王不敢食之  
佛化四鳥皆識宿命金仁佛時爲四比丘坐行凶暴  
不順正法逼迫同學故墮金翅鳥自首悔過改心易  
行發大道意行四等心不害羣黎以得善護吾等永

安不復見食志不懷懼長夜無難皆蒙佛恩今者如  
來受龍王請所演廣覆譬如虛空無所不蓋于今世  
尊還閻浮利海中諸龍無所依仰唯加大哀佛滅度  
時在此大海畱全身舍利一切衆類皆得供養華香  
妓樂被服幢旛轉加功德速脫龍身疾得無上正真  
之道諸見救濟惟佛垂恩威德兼加所願得果佛言  
善哉從爾所志時須菩提謂諸龍子諸仁者等勿建  
此心則爲妨廢一切之德所以者何佛泥洹後舍利  
分布八方上下天龍鬼神一切人民蚊行喘息人物  
之類皆當供養華香妓樂稽首自歸變化現光見者

歡喜知佛威神巍巍無極緣是信之皆發無上正真  
道意或成緣覺或得聲聞或生天上還得人身與法  
相值世世得度如是之計普蒙獲濟今者卿等各自  
求願使佛世尊在於大海而取滅度供全舍利獨欲  
奉侍一切衆生何緣得度永爲窮厄無一救護以故  
吾言勿發此心令佛世尊海中滅度獨奉全舍利而  
供養乎諸龍答曰唯須菩提勿宣斯言無以已身限  
礙之智以限如來無極之慧如來功德聖道自在無  
不變現無遠無近無彼無此普遊十方其若虛空發  
意之頃能令海中諸龍神宮三千大千世界州城郡

國縣邑丘聚人中曠野天上世間各各化現佛全舍利一切供養於佛身體不增不減分身十方無數佛土亦無所分普現一切不去不來譬如日影現於水中佛亦不生亦不滅度云何欲限如來慧乎欲限如來爲限虛空時須菩提聞諸龍子嘆如來德無窮無極不可譬喻默而無言海中諸龍虛空諸天及諸鬼神踊躍歡喜皆發無上正真道意時佛嘆嗟諸龍子曰善哉善哉仁等賢明誠如所云無有異也佛道高妙無邊無際無方無圓無廣無狹無遠無近譬如虛空不可爲喻

法供養品第十八

於是世尊告海龍王吾於大海所當教化皆以周畢欲還精舍卽從座起與大衆俱尋從寶階出于大海以無極莊嚴廣普威神住於海邊爾時大海神名曰光耀則以此偈而讚歎曰

身相三十二	天人所恭敬	無善神奉宗
稽首人中上	光如百葉華	猶若日盛明
清淨德超異	稽首施安隱	顏容殊妙好
百福功德相	德慧度無極	稽首於導師
施與調順上	積於清淨戒	忍辱力最勝

稽首世之上	過於最進力	禪定思清淨
智慧如虛空	稽首以自歸	行慈以等心
修哀攝衆生	喜心導御衆	常護度彼岸
妙音如哀鸞	所說踰梵聲	其響甚柔輒
願以稽首禮	降伏於魔怨	其力無等倫
遵修願道法	三處所奉持	淨除於三垢
講說三脫門	其名聞三千	是故稽首禮
善願常至誠	超度諸法上	尊勝諸國王
常施惠大財	以離諛諂塵	威神甚巍巍
光顏大殊妙	是以稽首禮	心堅如金剛

譬如須彌山	意至猶若地	故稽首德海
爲人說空義	常寂度無極	湛然心平等
願以自歸命	開演如甘露	無趣斷所趣
天人之所敬	願稽首最勝	聞天上人間
名稱無有比	德普不可量	稽首于德海
所作如所言	爲人說本行	所興爲人稱
稽首善調御	度於老病死	爲醫衆所奉
演說解脫句	稽首歸命佛	分別罪福應
淨除邪見冥	爲現正道行	歸命於最勝
以經寶布施	究暢于法樂	等心於怨友

以歸命世尊 我嗟歎導師 於德度無極  
所以咨嗟福 願後如世尊

於是海神光耀說是偈讚佛已顯揚大海如來出海  
海無威神願佛垂恩遺以法教使此海中蒙其莊校  
而獲度脫佛告海神有十法行得至莊校何等爲十  
護於諸根十善清淨志乎慈心不害衆生意立大哀  
發無上正真道一切布施以若干行莊嚴其願以大  
精進具足善法心常寂然不違本德好樂經法智慧  
清淨以愍哀行開化衆生立於正德入乎殊異以致  
欣悅逮得佛意導以佛教是爲十法致乎莊嚴時大

海神光耀與二萬天神發無上正真道意俱共歎曰  
今以莊嚴於是大海所以者何若發道意則爲莊嚴  
三千世界何況海乎我等以發諸通慧心一切莊嚴  
之功德也我在於海如來現在若滅度後擁護佛法  
令其宣布如來入城現衆莊嚴蒙以法恩化作講堂  
佛告光耀海神汝前後供養萬佛普立大殿又護正  
法次當供養賢劫與佛將導正法竟賢劫已當生無  
怒佛國妙樂世界轉女人身得爲男子無怒如來當  
授汝決爲無上正真道時大海神光耀聞佛授決歡  
喜踊躍則取珠嬰價踰海寶用散佛上卽而頌曰

佛以聖諦音 能仁授吾決 我不懷猶豫  
後當成佛不 可令三千界 地所有劈裂  
亦令月墮地 佛所說不妄 觀慈志境界  
心淨修精進 令察我莊嚴 恭敬慧法義  
覩安住所行 以慧決狐疑 了心如野馬  
所說審至誠 施安除衆苦 沒命救恐畏  
所療益無難 稽首最上醫 度脫諸惡趣  
歸命光照世 導師明無上 稽首佛說道  
其有聞佛聲 諸天人快利 佛法清淨行  
志在乎佛道 不得歸惡趣 便棄于八難

生在天人間 後得寂然跡

於是海龍王子名曰受現白佛言無央數天龍神香  
音神無善神鳳凰神山神恬柔神供養佛我身亦當  
少少供養如來正覺假使世尊愍傷聽者當化大殿  
譬如忉利最上選宮佛及弟子悉處其上送至靈鷲  
山世尊曰如仁者願宜知是時受現龍王子自以神  
力承佛聖旨化大嚴殿如忉利宮佛及衆會皆處其  
上在虛空中與八萬四千龍王諸后鼓諸琴瑟而雨  
衆華及一切香送佛世尊詣靈鷲山海龍王子與中  
宮俱在世尊前自投歸命願周不及所以者何所興

供養當如其寶佛爲一切無上福田世尊大寶假使三千大千世界滿中羅漢皆共供養於百千劫不如奉侍如來世尊如是乃應供養又世尊何謂菩薩供養如來佛言且聽菩薩所行供養如來其心清淨除於瑕穢而無諛諂本性自然不著一切諸善之本無加害心等視衆生除妖邪心所行鮮潔言行相應不侵欺世賢聖智足威儀至德一切平等而不違捨賢聖大願樂於空閑捨衆憤鬧自調其心聞法靜思解知本諦無我無人無壽無命入於空無人普達寂觀空無相無願至三脫法如是像法調諸邪見棄有常

無常不起不滅逮得法忍本淨無人無身口心志行因緣是則應法供養如來身口心行則不供養無所造行不進不退淨三道場等於三世除去三垢不著三界入三脫門得三達智是則名曰供養如來時海龍王問世尊曰其有人以華香雜香擣香繒蓋幢旛妓樂衣服飲食牀卧病瘦醫藥供養如來寧應供養不佛言龍王隨其所種各得其類此之供養不爲究竟離於塵垢植於德本逮至賢聖心之解脫不爲無德不至無上菩薩有四事應供養如來何等四不捨道心植諸德本心立大哀合集慧品建大精進嚴淨

佛土入深妙法心得法忍是爲四尊敬如來爲供養也爾時王舍城中梵志長者及無央數人民尊者大臣上至摩竭國王阿闍世王聞佛在大海龍王宮就請來還還靈鷲山時七萬二千人皆詣佛所王阿闍世與官屬三萬二千出王舍城詣靈鷲山稽首佛足遶佛三匝却住一面前白佛言佛入大海水何所至佛言大王其有比丘威光定意心正受者普現滿火其水安在王對曰三昧自在之所致也天中天志心所爲也佛言王寧得聲聞所興三昧自在已耶心之所爲乎如來常定等一切法曉了坐起而得自在於

法爲尊心無所礙佛入大海其處水類續見如故其陸地人覩乎大海其水枯涸但見衆寶而莊嚴之譬如第六他化自在諸天宮殿所莊嚴也佛光普照諸龍宮殿香音神宮無善神宮其大海中含血之類皆行慈心仁意相向無懷害者阿闍世王白佛言其海龍王久如發無上正真道意奉事幾佛何時當逮最正覺所號爲何佛告王曰乃往久遠無央數劫不可思議彼時有佛號光淨照耀如來至真等正覺明行成爲善逝世間解無上士道法御天人師號佛世尊乃在東方世界曰善淨現劫名可意寂其善淨現世

界平正而悉莊嚴假使一劫嗟歎其德不能究竟時  
有轉輪聖王號曰護天常供養光淨照耀如來四百  
二十萬歲一切施安竟此之數寐於夢中自然瑞應  
聞此偈曰

王以供養大聖人

甚多無量難思議

常喜慈哀於衆生

當發最上菩薩心

是供養尊妙第一

此則奉敬諸如來

其有能發菩薩心

則爲度世威神德

佛告阿闍世王其護天轉輪聖王夢聞此偈已寤自  
驚怪吾供養佛四百二十萬歲佛說經法章句各異

初未曾聞如此偈經是佛說耶魔所云乎卽疏偈文  
而諷誦之時光淨照耀如來行遊諸國聖王卽與八  
萬四千王及八萬四千后國中臣民其諸往者各八  
萬四千俱往追佛欲決斯疑卽逮見佛稽首足下敬  
問無量卽白佛言吾供養佛四百二十萬歲佛說經  
法若干種義我昨夜夢夢中見佛說此二偈寤甚驚  
怪未從如來聞此偈教不審佛所歎乎魔所說邪今  
故遠來欲決此疑唯願世尊分別說之佛告護天是  
吾所讚非魔所云王又白佛言我奉事世尊若干億  
歲供養衣食無所乏少爲我說經章句各異爾時何

故不歎此義佛卽以偈答王曰

人心羸劣未識遠

初習福事未見深

不可爲說微妙法

心中驚疑或能却

已解罪福信佛法

心堅意固不廻動

乃可爲說菩薩事

爾乃解至無極慧

時王及羣臣后民心中大悅皆發無上正真道意尋立不退轉地則以偈而讚世尊曰

不以貪諸色

亦不倚音聲

香熏衆細滑

不以此得佛

離懈怠怯弱

避貪嫉犯法

除瞋恚憤亂

乃得成正覺

捨身諸所安

代衆生受惱

精進常樂法

如是乃得佛

我今志大道

佛與天證我

唯導師造行

令所言無異

夢中聞道心

適聞志大乘

所作慧無礙

得至佛法王

佛告阿闍世王欲知爾時轉輪聖王護天者不今海龍王是彼時初發無上正真道意又王所問何時成佛王且當聽過二百無央數劫當成爲佛號無垢淨無量德超所有王如來至真等正覺世界曰法音聲劫曰首華其法音聲世界衆寶合成若干種色地平如掌其地柔輒如天統縱有萬億安明山廣普難量

安隱豐熟五穀平賤天人充滿衣服飲食如第六天人所居法音聲世界諸樹根莖節華實皆以七寶悉出無數若干百千道法音聲其界人民猶若諸天所語變化柔輒之聲皆承法音寂然憺怕及佛法眾智度無極四恩之教善權方便滅定離欲空無相無願無為無數以故其界名法音聲其有天人在彼土者樂法歡喜皆當入大聖分別諸慧審諦究竟發無上正真道意其佛欲說經時身放大光普照佛界其光明中則出億佛說講法聲時諸天人見光聞法欣然大悅往詣如來自歸供養則無央數以神足力飛

行虛空化寶蓮華而坐其上如來應時亦在虛空坐師子座為諸菩薩講說經道時十方無央數百千諸菩薩者皆當來會聽受經法其國人民皆樂經法亦無諸魔所有燒害亦無眾邪異道亦無橫死其佛壽十二劫諸菩薩行超過於空其國如是莊嚴無量說法無限菩薩無數

空淨品第十九

王阿闍世前白佛言唯然世尊常於諸法有大愍哀諸法誑詐因惑起想隨其所欲展轉相惑菩薩之行不可計量彼為菩薩當修修行至彼佛土具足嚴淨

諸菩薩行皆當追學攝取佛土如海龍王國土嚴淨  
 佛言如是如是大王一切諸法皆從念興隨其所作  
 各各悉成諸法無住亦無有處爾時阿闍世王謂海  
 龍王快哉龍王為得善利乃令如來授仁之決當成  
 佛時國土清淨不可思議龍王答曰法無有決所以  
 者何諸法皆淨因陰種人假名曰人其授決者無陰  
 種人已有名色假名為人其授決者無名無色因緣  
 報應見思想念假名曰人其授決者無有報應無見  
 無思無想無念假使菩薩等行德本彼之德本亦無  
 決矣諸法相空虛空無決一切諸法無相無願無為

無數不授無相無願無為無數之決也龍王復謂王  
 阿闍世諸佛大哀不可思議諸經無名無有思想而  
 說名想諸佛世尊無名相識而隨習俗因而示現有  
 授決也彼亦無法所授決也亦無內外當授決者阿  
 闍世又問龍王言以得法忍逮平等行菩薩如是乃  
 得決乎海龍王曰其忍悉空想不可盡究竟曉了至  
 于本際無盡之際平等之際無我之際吾我之際審  
 諦之際至于究竟無成就際其際以空至於脫際姪  
 怒癡際有了是際則無所倚無所倚者設於音聲而  
 無合會無合會者不著無脫無脫無行行無所行亦

無不行亦無所憂已無所憂於斯菩薩則觀一切諸所作行所見無見假使無所見不作審諦而已平等入已所住已平等度不殘不亂不卑不暴以等諸法然後得忍彼所謂忍及所授決若授決已及授決者是一切法皆平等法乎是諸法界究竟無法界不以決了亦無所成觀此法已察其義理諸法無能計者譬如虛空不可計數已度諸數諸法如是海龍王說是語時二萬菩薩得不起法忍百千比丘漏盡意解爾時王阿闍世白佛言至未曾有世尊龍王之辯佛言未足爲怪不以爲難新發意者聞是不恐不難不

畏是乃爲難所以者何諸佛世尊本之道法如是難及少有信者天上世間人不能受不入不信而不喜樂以故當知其有聞是深經法者不以恐畏此乃爲難前世供養無央數佛安以爲難譬如有人虛空無形而現形像是爲難不對曰甚難天中天佛言其聞此經深奧之義一切信樂皆知無我無人無壽無命其有信者甫當信者此等則是如來順明平夷之類親友善師也則能堪任信除垢塵爲一切人講說經法能詣道場以慈降伏百千億魔及餘官屬爲於諸法而得自在其心清淨諸通之慧近在目前發意之

項成智慧明達最正覺勸卹衆生知一切心羣萌諸  
根而轉無上大法輪也療一切病開化異道破壞怨  
敵吹大法螺於是海龍王所願皆獲不失本志聞所  
所授決欣然大悅善心生焉踊在虛空以偈讚佛

如虛空本清淨

無色無受無數

安住說法如是

若虛空普自然

名不有而不無

造因緣及報應

安住講調不諍

無人命無壽識

一切法甚清淨

吾我淨悉平等

吾我淨法等淨

解是者則授決

察法界本清淨

人界淨亦如是

如衆生界淨者

佛法淨亦復然

若佛法清淨者

諸佛土淨亦等

設佛土清淨者

諸慧淨無差特

諸法淨因數號

以計數不得名

由相數名本空

其諸名無數礙

羣萌類志所念

無見無色無成

如無成心意識

諸法爾空無心

或有作則無作

有緣罪無受者

終始瑕無行者

名泥洹無寂然

入本際無起原

虛空本無我際

選諸際得等原

知衆生本審門

去來今現在際

順明智此諸際

於慧等無際門

究法界佛種性

不起滅最勝幢

空無相願本淨

無言聲真諦法

是諸聖寂寞地

若解諸法憺怕

自然悅如捉空

彼無吾我身寂

假如此樂勝法

十方佛所說法

當來佛所宣揚

一切等未來聲

因音現入無聲

聲空自然如響

諸法空猶虛念

無法非法教化

誠本無可不得

一切法無主名

若干想念非明

人名淨不可得

諸法本淨如是

囑累受持品第二十

於是世尊告諸大士言諸正士汝等當持此如來說  
無上正眞道使得久存誰能堪任受持講說如是像  
經卽時三萬菩薩萬天子起任佛前同音白世尊曰  
吾等當受如是像經當令流布普周遠近佛又問言  
汝等云何而將御法持斯如來無上正眞道乎彼有

菩薩名曰慧英幢前白佛言唯然世尊隱省諸法都無所持寧能髣髴持佛道乎世尊答曰族姓子如斯則應持佛道也等見菩薩白佛言揆察佛道等乎五逆寧少髣髴持佛道乎世尊曰族姓子是故仁者則應持如來佛大道也無見菩薩曰唯然世尊我不見凡夫法亦不見學不學法不見緣覺及菩薩法亦不見佛法我爲持如來法乎世尊曰族姓子以是寂故應持如來佛大道也諸法無所願菩薩曰唯世尊我永不知一切諸法當所持者寧能爲持如來法乎世尊曰族姓子以是寂故應持如來佛大道也不昞菩

薩曰唯世尊我自不行亦不遣心亦不發意我寧爲持如來法乎世尊曰族姓子以是寂故應持如來佛大道也無礙菩薩曰唯世尊其不說法及非法不演法聲除諸法想如是行者爲護一切法乎答曰族姓子是應寂然無在菩薩曰唯世尊其不聽受法應不應爲護正法乎答曰族姓子是應寂然虛空藏菩薩曰唯世尊其觀諸法等如虛空不見彼法有所執持爲護一切法乎答曰族姓子是應寂然度金剛作菩薩曰唯世尊不壞法界入於人界及以法界爲持正法乎答曰族姓子是應寂然度不動跡菩薩曰唯世

尊其於諸法無所動轉不倚佛法及非佛法爲持正法乎答曰族姓子是應寂然嘲魔菩薩曰唯世尊其至魔界佛界則於佛界及與魔界悉以爲入諸法境界爲護正法乎答曰族姓子是應寂然無著菩薩曰唯然世尊其於諸法都無所得一切毛孔皆出法聲爲護正法乎答曰族姓子是應寂然普寂菩薩曰唯世尊不護諸魔行菩薩道爲持正法乎答曰族姓子是應寂然海意菩薩曰唯世尊其以海印等一切法修一切解味而知自然爲護正法乎答曰族姓子是應寂然須深天子曰唯世尊其有所生不起不生諸

陰種入無心意識爲護正法乎答曰族姓子是應寂然無垢光天子曰唯世尊其見諸法無垢塵者無眾瑕穢解脫諸受爲護正法乎答曰族姓子是應寂然度人天子曰唯世尊其度衆生不知萌類度無所度既有所度現周旋還不住彼此爲受正法乎答曰族姓子是應寂然賢王天子曰唯然世尊其於衆生而等一切諸法已等等諸國土等諸佛道爲受正法乎答曰族姓子是應寂然自在天子曰唯世尊其於諸法而得自在普於諸法不起不滅爲受正法乎答曰族姓子是應寂然善念天子曰唯世尊我不念法亦

無所得亦不有想爲受正法乎答曰族姓子是應寂然蓮華天女曰唯世尊知一切法皆爲佛法不成正覺無所不覺爲受正法乎答曰族姓女是應寂然麻油上天女曰唯世尊我不得女亦不得男如佛法相及男女法相亦復同等此諸法相則爲非法亦非無法無二無一亦無所至我爲受正法乎答曰族姓女是應寂然寶女曰唯世尊我不見佛道觀菩薩行爲被一切志德之鎧不察於本末我爲受正法乎答曰族姓女是應寂然無垢光女曰唯世尊於一切法不起法想於一切人不起人想亦不想念人法佛法觀

諸佛法入一切法不見本末我爲受佛正法乎答曰族姓女是應寂然建行如是爲受佛法於是天帝釋白佛言未曾有也世尊此女人等所說辯才不可思議分別方便合若干音文字之說講乎法界不亂諸法諸法平等如演說道等不差特佛言如是拘翼是諸女等分別無量不可思議法供養奉事不可計佛已得法忍又拘翼是經卷者號不起忍持無所御當爲衆會廣說其意如來滅度後受是法者護持法城則爲供養佛世尊已天帝釋白佛我已奉持此經本已佛所建立當令廣普當爲將來諸大士故分別說



世尊卽說頌曰

吾今所見國 佛眼觀十方 皆滿中珍寶

則以持布施 其所獲福 計當過於彼

至心受世吼 所說之經法 合集諸譬喻

一切歎廣法 終不能究竟 總持正法德

佛說是經時七十六那術人皆發無上正真道意六

萬菩薩得不起法忍三千大千世界六反震動其大

光明普照世間而雨天華百千伎樂不鼓自鳴諸妓

樂音出是輩聲如來之尊建立是經降伏衆魔化諸

外徑如來以印印此經已順而不忘爾時海龍王雨

大珠瓔供養此經周遍三千大千世界佛告賢者阿

難以是經卷用相囑累受持諷誦普令流布爲他人

說阿難對曰唯然世尊已受斯經經名何等云何奉

持佛言是經名曰海龍王問龍總持品又名集諸法

寶淨法門品當善奉持佛說如是海龍王及龍王子

諸天人民十方諸來大會菩薩諸大聲聞釋梵四天

王賢者阿難一切魔衆諸天龍神香音神無善神鳳

凰山神恬柔神及世間人民莫不歡喜作禮奉行

佛說海龍王經卷第四

音釋

經

佛說海龍王經卷四

三

景

喻許及切熊熊胡弓切皂昨早切懷其據切予

與吸同諛諛羊朱切面從也憤古對切蝦蝦慕胡

莫浮切加加切蠃吾官切蚊毒虺也岐去智切端昌亮切劈普擊

也涸水竭也邳雪律切悅悅惘往切髻髻撫兩切

髻猶也嘲交蹉蹉倉何切髮髻敷勿切

泰和信官蕭士璋捐俸刻

海龍王經全部

東塔寺釋道源 同對

東湖信士戈汕

崇禎壬午孟冬虞山華嚴閣識

經四卷 共字三萬五千六百四十一箇 計寫銀一兩四錢二分六厘 錢七分四厘 板四十七塊 工價銀二兩八錢八分 上元羅章書 句容李煥刻

佛為海龍王說法印經

唐三藏法師義淨奉制譯

如是我聞一時薄伽梵在海龍王宮與大苾芻衆千二百五十人俱并與衆多菩薩摩訶薩俱

爾時娑竭羅龍王即從座起前禮佛足白言世尊頗有受持少法得福多不

佛告海龍王有四殊勝法若有受持讀誦解了其義用功雖少獲福甚多即與讀誦八萬四千法藏功德無異云何為四

所謂念誦諸行無常一切皆苦諸法無我寂滅為樂

龍王當知是謂四殊勝法

菩薩摩訶薩無盡法智早證無生速至圓寂是故汝等常應念誦

爾時世尊說是四句法印經時彼諸聲聞大菩薩衆及天龍八部阿蘇羅健達婆等聞佛所說皆大歡喜信受奉行

佛爲海龍王說法印經

常熟信士毛鳳苞捐資刻

佛爲海龍王說法印經全卷

東塔寺釋道源 同對

海隅信士戈汕

崇禎壬午仲夏虞山華嚴閣識

長州李如科	共計工起龍書	板一塊	六厘	計刻銀一分	計寫銀一分	共字三百八十	經一卷
-------	--------	-----	----	-------	-------	--------	-----

佛經卷之三

二

長五

右遶佛塔功德經

唐于闐三藏實叉難陀譯

如是我聞一時佛在舍衛國祇樹給孤獨園與大比丘僧及餘無量眾俱前後圍遶爾時長老舍利弗即從座起偏袒右肩右膝著地合掌向佛以偈請曰

大威德世尊 願為我等說 右遶於佛塔 所得之果報

爾時世尊以偈答曰

右遶於佛塔 所得諸功德 我今說少分 汝等咸善聽 一切諸天龍 夜叉鬼神等

經

右遶佛塔功德經

三

長五

皆親近供養 斯由右遶塔 在在所受生

遠離於八難 常生無難處 斯由右遶塔

於一切生處 念慧常無失 具足妙色相

斯由右遶塔 往來天人中 福命悉長遠

常獲大名稱 斯由右遶塔 在於閻浮提

常生最尊勝 清淨種性中 斯由右遶塔

儀貌常端正 富貴多財寶 恒食大封邑

斯由右遶塔 財寶恒盈積 而無慳吝心

勇猛廣惠施 斯由右遶塔 色相淨微妙

見者皆欣仰 所住常安樂 斯由右遶塔

或為刹利王 妻子悉具足 威勢力自在

斯由右遶塔 或作婆羅門 持戒善通達

呪術圍陀典 斯由右遶塔 或為大長者

豪貴多財產 倉廩常豐足 斯由右遶塔

或為正法王 自在王閻浮 率土咸歸化

斯由右遶塔 或為具七寶 大勢轉輪王

十善御群生 斯由右遶塔 從此生天上

常有大威德 淨信於佛法 斯由右遶塔

淨信速成已 於法無迷惑 見諸行皆空

斯由右遶塔 從天上捨命 下生於人中

7  
8  
9  
10  
1  
2  
3  
4  
5  
6  
7  
8  
9  
20  
1  
2  
3  
4  
5  
6  
7  
8  
9  
30  
1  
2  
3  
4  
5

入胎不迷亂 斯由右遶塔 在於母胎中

垢穢所不染 如淨摩尼珠 斯由右遶塔

處胎及生時 令母常安樂 飲乳亦復然

斯由右遶塔 父母及親戚 一切共鞠養

乳母常不離 斯由右遶塔 眷屬皆愛念

超過其父母 資財自增長 斯由右遶塔

夜叉諸惡鬼 不能暫驚怖 所須自然得

斯由右遶塔 經於百千劫 其身轉清淨

妙色相成滿 斯由右遶塔 淨眼修且廣

猶如青蓮華 兼得淨天眼 斯由右遶塔

妙色常圓滿 諸相自莊嚴 成就大勢力

斯由右遶塔 或生帝釋宮 大威勢自在

切利天中尊 斯由右遶塔 或生須夜摩

兜率陀天宮 他樂及他化 斯由右遶塔

或復生梵天 梵世最自在 諸天常供養

斯由右遶塔 億那由他劫 常為諸智人

恭敬而供養 斯由右遶塔 其身及衣服

億劫常無垢 具足白淨法 斯由右遶塔

具大精進力 勤修種種行 未嘗有疲懈

斯由右遶塔 勇猛常精進 堅固不可壞

所作速成就	斯由右遶塔	深遠微妙音
聞者皆歡喜	安樂常無病	斯由右遶塔
如我所演說	厭捨三有苦	成就出世智
斯由右遶塔	常在四念處	及以四正勤
四如意神足	斯由右遶塔	了達四真諦
根力七覺分	正道及聖果	斯由右遶塔
滅一切煩惱	具足大威德	無漏六神通
斯由右遶塔	永離貪恚癡	及一切障礙
證獨覺菩提	斯由右遶塔	得妙紫金色
相好莊嚴身	現作天人師	斯由右遶塔

皆由以身業	及語業讚歎	右遶於佛塔
成此大利益	右遶諸佛塔	所得功德聚
我今隨所問	略說詎能盡	
爾時世尊說此偈已	舍利弗等一切衆會皆大歡喜	
信受奉行		
右遶佛塔功德經		

泰和信官蕭士璋捐俸刻

右邊佛塔功德經全卷

東塔寺釋道源 同對

東湖信士毛晉

崇禎壬午孟夏虞山華嚴閣識

經一卷  
共字一千一百十五箇  
計寫銀四分四厘  
計刻銀三錢八分  
板二塊  
共計工價銀八分  
上元于起龍書  
句容潘守誠刻

佛說妙色王因緣經

唐三藏法師義淨奉制譯

如是我聞一時薄伽梵在室羅伐城逝多林給孤獨園爾時世尊從定起已為諸四眾演說無上甘露妙法時有無量百千大眾前後圍遶諸根不動聽聞法要時諸苾芻既見大眾身心寂靜慙聽法咸皆有疑白佛言世尊惟願慈悲為斷疑網如來大師無上法主今此座中聽法諸人何故慙懃身心不動聽聞妙法如飲甘露

世尊告曰汝等苾芻我於往昔為求法故敬心慙重

汝等諦聽善思念之吾當爲汝說彼因緣乃往古昔於婆羅痾斯大城中有王名曰妙色以法化世國土豐樂人民熾盛無諸鬪戰詐僞怨賊亦無病苦災橫之事稻蔗牛羊在處充滿亦無瓦礫荒梗棘刺恩育兆人如觀一子其王敬信意樂賢善自利利人發堅固願有慈心希大法愍人衆愛群官除去慳貪常爲大捨王之夫人名曰妙容顏貌端正威儀詳審衆德圓滿人所愛樂其王唯有一男名端正子年雖幼小忠孝仁慈王所愛念無離左右後於異時其妙色王心希勝法召集群僚而告之曰我於妙法情生渴仰

佛說妙色王因緣經

四片五

卿等宜應爲我詢訪時諸大臣前白王曰大王當知大覺世尊出興世者方有妙法王報臣曰今雖無佛試爲我求時王卽便以箱盛妙金寶懸於幢上鳴鼓宣令普告四方若有爲我宣勝法者我以金箱報其恩德廣設音樂而慶讚之如是訪召經歷多時竟無一人能爲說法時王渴仰憂懷而住爾時帝釋徧觀下界誰善誰惡誰於勝因情無懈怠遂見此王爲法憂惱便作是念此妙色王久希勝法我當試之其事虛實遂卽化作大藥叉身手足異常面目可畏來至衆中而白王曰仁求勝法我能說之

經

佛說妙色王因緣經

八

四片五

王聞法音歡喜踊躍告藥叉曰密跡主有妙法者幸願爲說我當諦聽藥叉告曰大王今者生輕法心謂爲易得卽令宣說事不應然我身飢虛何能爲說王聞語已尋命膳官所有上食速宜奉進藥叉告曰王厨之食非我所食人熱血肉是我常食王言人之血肉何可卒求藥叉曰王之愛子宜應見與王聞此語便作是念我久辛苦尋求勝法今聞法音便成無價時端正子在父邊立聞是語已跪白王曰惟願父王勿生憂惱父之所望當令滿足可持我身奉密跡主以充其食王曰汝見求法捨所愛身善哉丈夫隨汝

所樂其端正子卽便以身奉上藥叉藥叉受已對王大衆分裂其身噉肉飲血王雖見此慕法情深了無驚懼時密跡主復告王曰我仍未飽更與汝妻時妙容夫人亦在王側聞斯語已亦同其子身奉藥叉藥叉受已噉其血肉復告王曰然我飢腸尚未充足王復白言密跡主一子已施妻復重食尚云飢虛隨意當取我願供給無退轉心藥叉告曰王之自身宜與我食王曰善哉實不敢恣然我身死如何聞法今我先可聽其妙法旣受持已當卽捨身是時藥叉共王立要卽於無量百千萬億大衆之中說勝妙伽他曰

由愛故生憂 由愛故生怖 若離於愛者

無憂亦無怖

王既聞此勝妙法已心生慶幸歡悅無量告密跡主曰我已聞法如說奉持今我此身隨意當食時天帝釋見王爲法身心不動如妙高山知其必當證無上覺捨藥叉像復天帝形信喜內充怡顏前進一手携子一手持妻而告王曰善哉善哉是善丈夫堅裝甲胄破煩惱軍濟度愚迷出生死海觀斯勇猛必當不久能成無上正等菩提汝之妻子今我相付時王卽便白天帝曰善哉善哉天王憍尸迦降大慈悲爲善

知識已能滿我樂法之心是時天帝於大衆中忽然不現

爾時世尊告諸苾芻於汝意云何勿生異念彼時妙色王者卽我身是端正子者羅怛羅是妻妙容者卽耶輸陀羅是汝等當知我往昔時爲求法故捨所愛妻子及以已身尚無所悋何況餘物由此緣故今時所有一切大衆從我聞法專心聽受無有疲厭又由我昔求法忘勞今於長夜爲衆說法亦無疲倦汝等苾芻當學於我恭敬尊重勤求勝法旣聞法已如說修行勿爲放逸爾時諸苾芻及人天衆聞佛說已歡

佛說妙色王因緣經

喜奉行

佛說妙色王因緣經

泰和信官蕭士璋捐俸刻

佛說妙色王因緣經全卷

東塔寺釋道源

東湖信士毛晉

同對

崇禎壬午仲夏虞山峯巖閣識

經一卷 共字一千四百七十九箇 計寫銀五分九厘 計刻銀五錢一分 七厘 板二塊 共計工價銀八分 上元于起龍書 長洲李如科刻

師子素馱娑王斷肉經

唐至相寺沙門智嚴譯

我憶過去無量劫

其王一時出遊山

忽逢雷雹惡風起

王獨走入深山林

牝母師子在山藪

衆生惡業宿緣在

王與師子夙因緣

多劫食肉殺生者

有王名曰素馱娑

群臣部從獵蟲獸

諸人分散悉驚惶

臨河蘇息無人伴

見王獨坐逼王身

轉種地獄苦無量

欲情俱起共交會

宿習故入師子胎

經 佛說妙色王因緣經 唐至相寺沙門智嚴譯 卷六

便生人身師子首  
 長成迅速甚猛利  
 其母師子答子云  
 子聞是已速往尋  
 引現具啓往因緣  
 然爲父王年老邁  
 號爲師子素馱娑  
 師子展轉惡習故  
 雖居人王不食穀  
 供進雜肉時將至

班足丈夫如獸王  
 問母我是誰體胤  
 汝父竭國素馱王  
 摩竭提國父王所  
 王聞自悟收爲子  
 登樓冊子立爲王  
 御殿朝政理臣民  
 多劫食肉害衆生  
 唯食鳥獸水陸蟲  
 闍拔獸肉狗銜將

闕肉厨人懼王斬  
 密截頭項并手足  
 王食其肉甚將美  
 王問食官是何肉  
 王赦其罪勿憂愁  
 厨人既承大王教  
 積年竊盜他男女  
 國內人民並持服  
 兩兩執手互相問  
 邑人守捕獲其賊

走出捕捉小嬰孩  
 全煮鑊中供進王  
 長嗜肉味狀燒薪  
 食官惶怖具啓王  
 每日供進是肉來  
 變服每日盜他兒  
 如行羅刹復如鷹  
 爲失子息各惶惶  
 氣噎無處告皇天  
 厨賊訴云不自由

國人聞此啓諫王  
 此日令密進孩肉  
 親戚臣民次第食  
 合國絕望無控告  
 王上高臺祈神鬼  
 若得翅飛取諸方  
 師子猛獸惡習故  
 囚繫高峯峻巖上  
 唯少一王擬當祭  
 於時王舍菩薩王

王聞忿怒大嗔責  
 從今每日料一人  
 如羊欄內被牽將  
 普集王衙欲除君  
 請翅飛騰免斯難  
 百國王頭祭山神  
 立得翅飛接諸王  
 已得九十九國王  
 師子而下更尋求  
 號為聞月園苑浴

師子見王坐玉可  
 爾時聞月王悲泣  
 我聞大王勇猛智  
 若也如是當應忍  
 聞月答王師子云  
 修行菩薩大慈悲  
 一生豪貴主天下  
 我又百國求佛法  
 未及聽法親授教  
 汝捨施我一七日

下捉右臂欲擒將  
 師子問王何故啼  
 菩薩不顧身命財  
 何得苦憂不自由  
 一切憂苦不過慈  
 我今憂彼百國王  
 今日囚繫命欲終  
 請得法師遠方來  
 國人渴仰未曾聞  
 供養三寶聽法音

集會群臣囑累法

八日當自迎大王

以其菩薩無詐妄

師子許王七日期

八日聞月出城迎

捨身施待師子王

於時師子如雲現

擒接聞月對眾將

師子問王可無畏

敢出我前如獸王

聞月答王師子言

是身虛假施大王

寧捨百千身命財

不犯前言失汝期

和顏悅色方便語

聽我少時說因緣

汝欲祭祀邪神鬼

諸部善神與汝殃

十方佛刹諸賢聖

多劫汝不更聞名

是身虛假合因緣

命若電光無停住

五根六識無人我

眼耳鼻舌觸爲因

如幻變化見衆像

衆生妄想執爲真

從頭至足驗此軀

無有一事是常住

如水中泡刹那滅

老病死苦亦無常

汝今唯肉養其身

究竟無依無善路

殺生無量食噉肉

展轉受苦惡道中

爾時聞月無量偈

勸化師子素馱王

師子聞已漸迴心

聽聞無我實相體

師子問王如何計

祭祀無罪得神歡

聞月答云辦素味

無辜淨食祭祀天

師子依命祭山神

捨身施與聞月王

山中囚禁諸王者

並皆付囑聞月將

聞月各引還本國

依舊安置理人民

并將師子素馱王

摩竭提國坐本宮

和合諸臣及萬姓

闔國斷肉不殺生

爾時聞月發大願

願我成等正覺時

解脫一切普舍生

此等諸王同成佛

所授師子王妙法

願其重罪得雪銷

又念過去阿僧祇劫釋提桓因處忉利宮以於過去

食肉餘習變身為鷹而逐於鴿我時作王名曰毗

憇念其鴿秤身割肉代鴿償命尸毗王者我身是也

後當作王名曰聞月其時帝釋化為鷹者後當作王

師子素馱釋試我故尚生惡道況餘衆生無慙專殺

食啖血肉無止足時一切衆生從無始來靡不曾怨

父母親屬易生鳥獸如何忍食夫食肉者歷劫之中

生於鳥獸食他血肉展轉償命若生人間專殺嗜肉

死墮阿鼻無時暫息若人能斷一生食肉乃至成佛

無由再食

師子素馱娑王斷肉經

泰和信官蕭士璋捐俸刻

師子素馱娑王斷肉經全卷

東塔寺釋道源

東湖信士毛晉

同對

崇禎壬午仲夏虞山華嚴閣識

經一卷  
共字一千四百五

十箇  
計寫銀伍分八厘

厚  
計刻銀五錢零七

板三塊  
共計工價銀一錢二分

上元于起龍書  
句容潘守誠刻

差摩婆帝受記經

元魏三藏菩提留支譯

如是我聞一時佛住王舍城耆闍崛山中與大比丘  
衆二十千人俱多有諸菩薩謂彌勒菩薩文殊師利  
等諸大菩薩衆

爾時世尊於晨朝時著衣持鉢彌勒菩薩相隨俱入  
王舍大城而行乞食遂爾往到頻婆娑羅大王宮殿  
到已欲入爾時即見頻婆娑羅大王夫人差摩婆帝  
在重樓上既見世尊心更清淨從樓而下敷大價衣  
名波都拏如來坐上彌勒菩薩坐尼師壇

爾時世尊彌勒菩薩二俱坐已時王夫人差摩婆帝  
一切莊嚴莊嚴其身禮世尊足并即禮敬彌勒菩薩  
於世尊前斂容正坐心生敬重欲聞說法

爾時世尊見王夫人差摩婆帝一切莊嚴莊嚴身已  
為欲利益一切衆生饒益一切諸衆生故知而故問  
差摩婆帝王夫人言差摩婆帝彼名何樹汝身今著  
如是色果第一光明端嚴殊妙時王夫人差摩婆帝  
以偈答曰

第一大丈夫 知而故問我 彼樹名何樹  
汝著如是果 彼梵名福德 我於往世種

此果是彼果 我今如是食 又已種彼樹  
於正覺聲聞 安住菩提道 求正覺者地  
施戒水濕潤 令彼樹增長 彼樹增長已  
生此端嚴果 忍辱精進力 能增長彼樹  
彼樹增長已 生此無垢果 禪慧開敷華  
令彼樹端嚴 我今食此果 如世尊所見  
如樹林草等 一切依止山 枝葉等增長  
上下皆不動 如是彼大樹 我前世善種  
利益諸衆生 為得諸佛法 如是福德樹  
我此唯其華 我今且爾食 果猶故在後

第一菩提果 無上佛菩提 捨婦女劣身

後必得彼果 我當得丈夫 衆生中上上

一切法彼岸 一切智徧見 我解脫衆生

一切苦怖畏 一切當歸我 愍一切衆生

爾時世尊告王夫人差摩婆帝作如是言善哉善哉

差摩婆帝汝能如是利益多人安樂多人憐愍世間

饒益安樂一切大衆諸天人等時王夫人差摩婆帝

聞佛讚已白言世尊世尊此身三十二種大丈夫相

八十種好何因緣得十如來力四無所畏及四無礙

復有十八不共佛法大慈大悲大喜大捨如是種種

無量無等不可說盡無數佛法從何而生時王夫人

差摩婆帝如是問已佛說偈言

我亦復如是 往世種彼樹 爲利益衆生

希求正覺智 修行施戒忍 精進禪和集

復於一切時 恒常習禪慧 於一切衆生

不曾起惡心 常行平等心 今日得成佛

常於愛不愛 善友怨平等 得平等心已

福德樹增長 我此身大樹 攝無量功德

曾爲轉輪王 亦作帝釋王 復作大梵天

種種多富樂 不思議佛法 相等今復得

時王夫人差摩婆帝聞說如是諸功德已讚言善哉  
於世尊語極生隨喜即向如來而說偈言

如勝人中勝 如是隨順學 如本學善學

無邊功德海 我今學佛學 諸功德彼岸

當離生死苦 得如是牟尼 我本諸生處

曾修行布施 願彼一切福 得佛無等智

過現諸生處 我護持禁戒 願彼一切福

當得如來智 我修忍精進 三昧般若等

願如是一切 皆成就佛法 我身口意業

所修行諸善 願得大菩提 求佛智功德

我捨婦女體 得勝丈夫身 得丈夫身已

次第得佛身 得勝菩提已 轉無上法輪

與縛生死獄 衆生除解脫

爾時世尊爲王夫人差摩婆帝偈說善哉而讚之言

善哉此語說 善哉心善願 汝當破壞魔

而得成正覺

時王夫人差摩婆帝既蒙世尊現自授記聞已歡喜  
起勝上心生決定意多奉世尊佉陀尼食蒲闍尼食  
婆陀尼食事事豐足如是并奉彌勒菩薩摩訶薩食  
爾時世尊既食已離鉢洗手既洗手已爲王夫人

差摩婆帝復更說法示已教已勸已導已令歡喜已  
 與授記言差摩婆帝汝於未來過無量劫當得作佛  
 號曰功德寶勝如來應正徧知明行足善逝世間解  
 無上士調御丈夫天人師佛世尊汝佛世界第一清  
 淨無有惡道苦惱之事心喜心樂莊嚴殊妙第一清  
 淨菩薩住處如是嚴淨佛之世界汝當得之佛說如  
 是法門之時有多千數諸優婆塞一切皆發阿耨多  
 羅三藐三菩提心多千衆生人天世間於法不疑得  
 隨順心  
 如來說已差摩婆帝彌勒菩薩一切衆會并諸天人

及阿修羅乾闥婆等聞世尊說皆大歡喜  
 差摩婆帝受記經

泰和信官蕭士璋捐俸刻

差摩婆帝受記經全卷

東塔寺釋道源

東湖信士毛晉 同對

崇禎壬午仲夏虞山華嚴閣識

經一卷  
 共字一千六百十  
 二箇  
 計寫銀六分四厘  
 計刻銀五錢六分  
 四厘  
 板三塊  
 共計工價銀一錢二分  
 上元千起龍書  
 句容潘守誠刻

師子莊嚴王菩薩請問經序

唐終南山釋氏道宣撰

觀夫法王利見權巧殊途或聲光動人或開智攝物  
立儀列相興像設之機緣聚沙塗地表乘時之淨養  
斯德有歸可略言也有師子莊嚴王菩薩者學周八  
藏智越五乘籍勝報而開教端寄善權而行圖範故  
使方壇外啓圓場內羅列八座而延八聖陳四報而  
成四德空有兩業自此修明大小諸乘因茲增長可  
謂總攝六度之玄略統願行之明規其道易而可修  
其儀約而難隱智有通塞道涉窅隆時運所歸近聞

東夏逮龍朔三年冬十月有天竺三藏厥號那提挾  
 道開萌來遊天府皇上重法降禮真人厚供駢羅所  
 誠甘露南海諸蕃遠陳貢職備述神藥惟提能致具  
 表上聞霈然下遣將事首途出斯奧典文旨既顯異  
 由來之所傳道場不昧赴機緣之淨業輒以所聞序  
 之云爾

師子莊嚴王菩薩請問經

唐中天竺三藏法師那提譯

如是我聞一時佛在王舍城耆闍崛山中與大比丘  
 衆千二百五十人俱菩薩摩訶薩五百人天龍夜叉  
 乾闥婆阿修羅迦樓羅緊那羅摩睺羅伽人非人等  
 無量八部前後圍遶聽佛說法

爾時衆中有菩薩摩訶薩名師子莊嚴王從座而起  
 來詣佛所頂禮雙足遶無數匝而白佛言世尊我於  
 過去億百千那由他諸佛所廣預大會然未曾覩如  
 今所見欲有請問惟願聽許佛言隨汝所問當爲解

說爾時師子菩薩王菩薩白佛言世尊如來往昔修  
 何勝行今獲如是人天中尊為諸菩薩大聲聞衆天  
 龍八部之所圍遶供養恭敬尊重讚歎願為演說往  
 昔因緣令諸衆生獲大善利

佛告師子莊嚴王菩薩摩訶薩言善哉善哉汝今乃  
 能安樂衆生故作是問諦聽諦聽善思念之當為汝  
 說善男子我憶過去無量世時有佛出興名不可思  
 議光明如來應供正遍知明行足善逝世間解無上  
 士調御丈夫天人師佛世尊時有長者名曰上施自  
 恃豪富不信正法而於佛所無歸敬心有一比丘名

毗闍耶三皤

補我切

婆見是長者生憐愍心起大方便

要令此人發心修行得成正覺作是念已往長者家  
 爾時上施覩見比丘顏貌殊勝威德備足諸根寂定  
 容光熾盛肅然敬重即起奉迎頂禮既訖設座令坐  
 合掌白言自顧薄德忽蒙臨降

爾時比丘告長者曰有大法門名八曼荼羅功德無  
 量今為汝說廣欲惠利諸天人故若有衆生聞此法  
 門能修行者在所生處獲四勝報一者與善知識諸  
 大菩薩同處受生有大眷屬資財豐足二者眷屬既  
 多自在無礙三者身相圓備無有疾病四者衆具自

然隨念而至縱被山壓身無痛苦能知衆生心之所念慈悲憐愍將護拯濟

爾時上施聞是法已歡喜踊躍重加頂禮讚言善哉願爲廣說八曼荼羅最勝法門我當修學比丘告白汝欲知此最勝法者先發是願我欲供養三世諸佛大菩薩衆聲聞緣覺作是語已道場之處當作方壇名曼荼羅廣狹隨時其最小者縱廣四指或一搩手用種種香及以餘物或地上作方院之內列八圓場爲欲供養八菩薩故何等爲八觀世音菩薩彌勒菩薩虛空藏菩薩普賢菩薩執金剛主菩薩文殊師利

菩薩止諸障菩薩地藏菩薩如是長者此八曼荼羅最勝法門是彼不可思議光明如來所說我親受持今爲汝說應當修學廣令流布用此善根廻向阿耨多羅三藐三菩提長者當知若有修行此八法者則爲供養二世諸佛大菩薩衆緣覺聲聞斯人常爲諸天擁護若諸國王能自修學若使人作所王國內諸惡皆滅諸善男子及善女人有能修學八法門者命終之後不墮惡趣邊地邪見不善律儀貧窮家生是故當知欲得現在未來勝上報者當學如上八種法門欲得受身端正聰明智若欲上生四天王處亦

應修學八曼荼羅如是欲生三十三天夜摩天兜率陀天化樂天他化自在天乃至帝釋梵王魔王轉輪聖王所生處者皆當修學如上八法欲得天上人中大姓家生眷屬成就財寶盈溢身心安樂名稱遠聞所出教命無不信受於諸衆中最尊最勝皆應修學如上八法若欲修成須陀洹果斯陀含果阿那含果阿羅漢果辟支佛道入菩薩位乃至阿耨多羅三藐三菩提皆當修學八曼荼羅供養法門

佛告師子莊嚴王菩薩摩訶薩言爾時比丘毗闍耶三幡婆者豈異人乎令文殊師利菩薩是爾時長者

上施者卽我釋家牟尼佛是我從是來經於多劫修行供養此八法門具獲如上功德利益餘有衆生隨能修學亦皆同獲如我所得善男子我行菩薩道來經三阿僧祇劫修滿六度利益衆生成等正覺所有光明威德勢力破魔兵衆斯誰力乎皆由供養八曼荼羅道場功德是故衆生聞說如上八種法門無宜不學若以華香燈明若以飲食幡蓋衣服音樂讚歎禮拜發願懺悔隨其力能皆蒙福祐或行六波羅蜜時修立道場以諸香水若香塗地若水若土作方圓壇斯卽名爲檀波羅蜜修供養時身口意業不惱衆

生斯即名為尸羅波羅蜜修供養時若有蟲螳來入道場驅去還來爾時安忍斯即名為羸提波羅蜜修供養時善心相續斯即名為毗梨耶波羅蜜心不散亂一心供養斯即名為禪波羅蜜作業之時方壇圓場無有偏斜善能通曉廢立機候斯即名為般若波羅蜜善男子如是一法隨心變現即能具足六波羅蜜應當廣說教化眾生為大利益乃至成佛

說此經已師子莊嚴王菩薩摩訶薩及諸天龍夜叉乾闥婆阿修羅迦樓羅緊那羅摩睺羅伽人非人等皆大歡喜信受奉行

師子莊嚴王菩薩請問經

音釋

疵尼八反

泰和信官蕭士瑋捐俸刻  
師子莊嚴王菩薩請問經全卷  
東塔寺釋道源  
東湖信士毛晉 同對  
崇禎壬午仲夏虞山華嚴閣識

經一卷  
共字二千零十一  
筒計寫銀八分一厘  
計刻銀七錢零二厘  
板三塊  
共計工價銀一錢二分  
上元千起龍書  
長洲李如梓刻



リノ  
卅五